

UANËN DADA UAID

Nuquin Papa tantiamianquid chiaid

¹ Ëndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquiobidi yec: –Nadquio Nuquin Papa iquec –quec tantiamianquidquio nec. ² Aidëmbi Nuquin Papabëd icquin ³ abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. ⁴ Aidquio Nuquin Papa yacno tabadmianquid nec. Nuquin Papapadquidquiobidi yec: –Nadquio Nuquin Papa iquec –quequin paposhquiacbimboecnuc tantiamianquidbidi Esus nec. ⁵ Adembidi matses ambi icsamboen naid tantiamequid nec. Adquid icquin: –Con Pamboen bëdamboshë icquidquio nendac. Aidën chiaid niacniaquec mibi icsamboec tabadec –quequin chuisho tantiatiapimbo icquin matsesën Esus chieshëmpondash.

⁶ Aden Esusën chuibeniabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. ⁷ –“Nuquin Papa yacnuësh abi tantiamequidquio choendac,” quequin Uanën chuibansho tantiashun ma dadpenshun ambi chuiboed tantianu –quequin Nuquin Papan con shënisio abi chuibanquid icmepanëdash. ⁸ Nuquin Papa yacnuësh choacmaidëmbi con shënision: –Nuquin Papan

chomiaid Esus nec –quequin chuibampondash.
 9 Aden ambi chuibodquio Nuquin Papa tantiamenuec matsespanëdash Esus.

10 Adash matsesbëd tabadsho ambi matses uaidombi tantienquio icquin chieshëmpondash.

11 Aden con matses isadaidbon Esus tantienquio iccondash. –Isadaidbo con matses nec –Nuquin Papa quenëdacpadquiec: –Isadaidbo con matses nec –queoapondash Esus. Adsho ambi con matses caidonquiobi dadpenshun Esus tantienquio icpondash.

12 Utsibombien daëdpactsëcshun: –Nuquin Papan Madombo Esus nec –quequin tantiasho Nuquin Papan: –Con mado nec. Con champi nec –cabempanëdash.

13 –Con matsesuidien Nuquin Papan: “Con mado nec. Con champi nec,” capec –¿quequidta adopanëdash? Padenquio. –Nuquin Papan mado nebi –quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomben aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

14 Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin natiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën.

15 Aid con shënision chuipondash. –Èmbi chuibodquio nec. “Èbi ic-saquid icnuc bëdamboshë icquidquio choec,” èmbi caboedquio nec. “Èmbia Nuquin Papan chiaid chuibambon aidëntsen tsyuec choshon chuiba-

nendac. Ēbi bëyuc tishaidi tishabi icnubi aid ěnden icpampic,” ěmbi caboedquiobi Esus nec — quepondash con shĕnisio.

¹⁶ Con shĕnision chiacpadquidquio icquin abi tantiaquido Nuquin Papan bĕdamboen isaido icmeshun adenuidi Nuquin Papa nuqui bĕdamboen ismec. ¹⁷ Ęndenquimboshĕ Nuquin

Papan chiaid dada uaquin Moisesĕn Nuquin Papan matses icsaido cuidte tantiamepampic. Padnuen Esuquidistun Nuquin Papan bĕdamboen iste tantiamequin: —Nadquio Nuquin Papa iquec —quequin matses bĕdamboen tantiamepondash.

¹⁸ Ambi isacmaidquio icsho matsesĕn Nuquin Papa bĕdamboen tantiatiapimbo iquec. Padnuen aton Mado abentsĕcshunquio aton dayun tsadquidĕnquiobi matsesun Nuquin Papa bĕdamboen tantiamepondash. Aidquio chuinu. Tantia.

Tsusiobon chuimiac Uan acten mentoanquidĕn chiaid

(Mat 3.11-12; Mad 1.7-8; Duc 3.15-17)

¹⁹ Con shĕnisio Nuquin Papa tantiabenquid acten mentobenequid niondash. Aden acten mentobenesho isash Moisesĕn chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shĕnisio chuituidpondash. ²⁰ —¿Tsuntsin chiac nai?

¿Mimbembida nai? “Bĕdamboshĕ icquidquio Nuquin Papan chomendac,” quequin nuquin tsusedpan ¿dada uapampidta ne? — catuidpondash. Adoaquien: —Padenquio.

Aidpenquoio nebi –quepondash. ²¹ Adshobien: –¿Tsumintsi ne? ¿“Naden naindambi,” quequin Nuquin Papan chiaid chuibanquidquoio unëspampid Edias uincuenaidta ne? –caquien: –Padenquoio. Aidpenquoio nebi –queoapondash. Adshobien padpiden: ¿Tsumintsimbo ne? “Moisespadquidquoio choendac,” ¿capampidta ne? –caquien: –Padenquoio. Aidpenquoio nebi –queoapondash con shënisio.

²² Adshobien padpidemboen: –¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded ëbi chui –caquien: ²³ –Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bëdamboshë icquid chomiabi icnuc aid bëyunquec utsiba choendac. Aidën shubu nibëdacno capucuenequin chuiba-nendac naden.

‘Chuiquid dapambo choeque. Podqued andëdbanshunta,’

quiachimboen chuiquin: ‘Nuquin Icho choeque.

Icsaid ënash bëdamboec tabadta,’

quequin chiendac bëyuc choshon,”

quequin chuipampid nebi –quepondash con shënisio.

²⁴ Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. ²⁵ –Utsibon: “¿Adquidta ne?” cac: “Adquidpenquoio nebi,” queuidequi

mibi iccoc. “¿Mitsipadquidquoio icquin acten mentobano?” mibi caimbi –caquien: ²⁶ –Nuquin Papan chiacpadomboen abi tantiabenquido acten

mentobenec nebi. Ëmbi aden bēdamboen nanuc utsimbien bēdamboenshē naindac. Aidi mibēdi tabadshobi ma mimbi tantienquo icboc. ²⁷ Ëmbia Nuquin Papan chiaid chuibanombi. Aidēntsen tsyuec choshon comapenen tantiaquin Nuquin Papan chiaidquo chuiquin Nuquin Papambo tantiamendac. “Aidi bēdamboshē icquid icnuc ēbi icsaquid icsho ꞑatotsieshun: ‘Aid choec,’ quequin chuiquidquo Nuquin Papan icmioshi?” quec tsadebi —quepondash con shēnisio padiseyobo chiec. ²⁸ Acte Odan caid uquē cuēmatsiucūesh shubu dadpen icquid Betania caid yacnuēsh adpondash.

Abided cuidadtequid nendac, Esus caid

²⁹ Badiadshun padpiden con shēnision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquo obeca bacuēbimboecquid choeque. Aidi isadaidbon obeca bacuēded cuidquin unēs uacbimboec matses icsaid bedshunec abided cuidadec unēsendac. ³⁰ Ëmbi chianeboedquo nec. “Èbi bēyuc tishaidi tishabi icnubi aidi ènden icpampic,” quiash: “Èbi bēdapabi icnuc bēdamboshē icquidquo choendac,” quepobi. ³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidēmbi èmbibi badedquo tantienquo iccombi. “Nuquin Papan chomiaid nec,” quequin tantienquo iccombi —quepondash con shēnisio.

Esus mentoaid
(*Mat 3.16-17; Mad 1.9-11; Duc 3.21-22*)

³² Adashic abi onquec: —Nuquin Papan naden ismiac tantiabenombi. Aton Mayan aton dada nibëdquiec dëbimbimboec budec: “Matsadtoendac,” quebocpadequi Esus matsadtocho ispombi. ³³ Adsho isash: “Adquidshenda caposh Nuquin Papan: ‘Acten mentoanquid icta,’ ëbi caboedën. ‘Con Mayan dëbimbimboec budec matsadtobedën abi tantiaquidobëd con Mayan tabadmendac,’ Nuquin Papan caboedshenda nepec,” quiobi Esus caic. Embembi tantienquio ictsenombi. ³⁴ Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquio Esus nec,” quequin mibi chiec nebi —quepondash con shënisio.

Nëid dada uaquid Uan Esusbëd yanaid

³⁵ Adashic badiadash ambi acten mento-bambocno con shënisio nidoapondash. Aid tsibanequi nidoapondabi. ³⁶ Adec nidquin isquien Esus cuempec. Cuensho isashien con shënisio: —Is. “Nuquin Papan namiaidquio obeca bacuëbimboecquid nec,” ëmbi caboed cueneque —quepondash.

³⁷ Adsho tantiatanequini con shënisioobëd iccondaaid utsibëd Esus chinunec nidpondac.

³⁸ Nidquin chinunac bidiadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquio nec —quequin con onquetembi Dabi caondambi.

³⁹ Adoac: —En isec cho —cac abi ushacno isec nidondabi. Ushë abucquio icnuc puduedash yuec tabadec onquetaniash inchështsëcnubi chondabi.

⁴⁰ Ëbëdtan Esus chinunondaid Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash. ⁴¹ Adnubien Andedes aton buchi chiec nidpondash. Adec nidquin Petedo istuidash: —Nuquin tsusedpabon chuipampid Nuquin Papa yacnuësh choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yac bimboec mibi chieshtoenquo icquid yanendac,” quequin mibi nidaid moco cuënendambi —quepondash Esus Petedo caic. Con onqueten nidaid moco cain Sepas capondash Esusën. Quidieco matsesën onqueten Petedo capondash.

Esusën Uedipebëdta Natanaid istuidaid

⁴³ Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash.

⁴⁴ Betsaida yacnuësh caniquidbidi nepondash aid. ⁴⁵ Esusbëd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon: “Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen

mado nec –quepac caondash. ⁴⁶ Adsho tantiash: –¿Nasaded yacnuështa dada bëdambo icquid chopatsiash? Auëshquio dada bëdambo icquid chotiapimbo iquendac –quepac caondash Natanaid. Adsho tantiash: –En isquiec cho –quepac caondash Uedipe.

⁴⁷ Adoac choshobien Esusën: –Is. Isadaidbombo neque. Muesambo nec –caquien ⁴⁸ Natanaidën: –¿Mitsipaden ëbi tantie? Mabi mimbi isacmaidquio nepayoc –capondash. Adoquien: –Uedipen bedtanabi icnubi mibi cuëte icueda caid tayun tsadsho tantiombi –capondash Esusën. ⁴⁹ Adsho tantiashumbien: –Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac –capondash Natanaidën: –Istiapimbo yacno chiosh –quequin tantiashun. ⁵⁰ Adoquien Esusën: –“Cuëte icueda caid tayun tsadsho mibi tantiombi,” ëbi qesho ¿tantiash: “Nuquin Papan Madombobien nec,” badedquio que? Padpiden comapenen tantiaquin nabansho isun mimbi ëbi tantiaquiotsiandac. ⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquio iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abëd tabadte tantiamec,” quequin mimbi ëbi tantiendac –quepondash Esus abëd icquido chiec.

2

Esusën ambembi actequid uaid

¹ Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobêd Esusën tita puduedpondash. ² Esustsen puduedpondash. ³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimbi tantiacpadomboen nata, mado —capondash. ⁴ Adoaquien: —¿Atotsi quequin mimbi ëbi chuipe, tita? Chiata. Con Pan tantiacpadënquio naimbique —quepondash Esus. ⁵ Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash. ⁶ Ambobi tēchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. ⁷ Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. ⁸ Cushtobanacsho isun Esusën: —Ueshun buanshun mibi ancaquid acmetan —cac acmetampondash. ⁹ Adoac acquin tanaquien actequid bëdamboshë icquid icpac caondash acte icboedi. —Nibëda damboedquio ¿mitsimbo bedpash? —quepac caondash yuabo ancaquid. Adsho tantiashun

yuabon: –Esusënquiobien naccosh –quequin tantiapac caondash. Adnubien yuabo ancaquidën chido bednuequid chuipondash: –Aidën actequid bēpash –queshun. ¹⁰–Nuquin matsesën actequid bēdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsēcquidtsen acmenu,” quequid yendac. Aden mimbi nambo. Bēdambo icquidquo ma mimbi nēbi acmianeyoc –quepondash yuabo ancaquid chido bednuequid chiec. Adnubien yuabon actequid bēdamboshē icquid abitedi acmebampondash.

¹¹ Aden comapenen tantiaquid icquin ambembi actequid uaquin Esusën tauamboen ismebempondash. –Nuquin Papa yacnuēsh choquid yec comapenen tantiaquidquo nebi –quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquo. Adosho isun: –Con matsesën chiampid Nuquin Papan chomiaidien nec –quequin tantiabenondambi.

Esusën chushcaquin cuemiaid

(Mat 21.12-13; Mad 11.15-18; Duc 19.45-46)

¹² Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abēd icquido yec ēbi yec quec Esusbēd nidaniondabi. Ambo daēdpactsec ushec tabadondash. ¹³ Ambo ushcuidanec nidequi shubu dadpen icquid Edusaden yacnotsen Esus nidaniondash. –Nuquin matses tsusedpabo unēs uainquo icquin Nuquin Papan matamiampid inchēsh tantiaquin obeca bacuē pec nēbi tabadeque. Isec nidnu.

Nid –quianec nidanepondash. ¹⁴ Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpactsëc menequido niondash. ¹⁵ Adec tabadsho istanquimbien Esusën cueshcate badedquio nacnentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiacbanquin piucquid siabudshumbampondash. ¹⁶ Adotanquimbic dëbimbimboecquid yuaquidotsen chushcapondash. –Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc –quequin chushcapondash.

¹⁷ Adsho isun naden tantiondambi. – Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusën nate chuiquin dada uapampic –quequin tantiondambi.

¹⁸ Aden nicacsho isumbien con matses chuiquidon: –¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme –caquien ¹⁹ ismenquio icquin ompoacbimboen Esusën chuipondash. Abibi cadequi: – Mimbi nëid shubu icsa uabocsho padpiden

nacnenoaindami bēdambo icnuc. Daēdec ushquin nacnenquin nainendambi—quepondash Esus. ²⁰ Adsho tantiash Nuquin Papa tabadte shubu uashunaid dapa ca danec: —¿Badedquioda nacnempatsia? Nēid nacnenquin seta dadpenquioshē 46tedquiobi matamiac cadenec—quepondash con matses chuiquido.

²¹⁻²² Yuecquio ictaneshun Esusēn aden chiaid tantiondami. Unēs uacsho chococac daēdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daēdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic—quequin tantiondami.

Dadpenshun Esus tantiauidaid

²³ Nuquin Papa tabadte shubu uashunaid daquēnē uacnoshon cuemeshumbic Edusaden yacnoshontsen comapenen tantiaquin nabanquin Esusēn ismepondash. Adsho isun matses dadpenshun: —Nuquin tsusedpabon chiampid Nuquin Papan chomiaidien Esus nechitec—queshun Esus bēdiactsēc tantiatsēccondash. ²⁴ Aden tantiatsēcsho ambembi tantiash: —Ai, ēbi tantiaquidquio nec—quenquio icquin: —Ēbi bēdiactsēc tantiatsec—quequin tantianēdash. ²⁵ Utsin chiambobi ambembi tantianēdash. Aden matses abitedishun otacquio tantiaid ambembi tantiaquidquio Esus niondash.

3

Esusēn Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. ² Inchëshën Esusbëd onquenuec chopondash. Choshombic aidëmbi: —“Nuquin Papan icmiacpadquid chuiquidquio mibi nec,” quequin tantiemi. Mibi comapenen tantiaquin nabansho isun: “Nuquin Papan namiaidënuidtsëquien adotsiash,” mibi caombi —quepondash.

³ Adsho tantiashun: —Ai, adquid nebi —quenquio icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquio ictsiac ⁴ —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. ⁵ Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquio iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. ⁶ Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. ⁷ “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec. ⁸ Tantia. Mibi chuinu. Cunquequid isadenquio

icquid nec. Isadenquo icquimbi cuncac cuëte ishcodsho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac — quepondash Esus.

⁹ Adsho tantiash: —¿Midapadec? —quepondash Nicodemo. ¹⁰ Adoaquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. ¹¹ Ènden ushë utsin mibi chedo chiombi. Èmbi isondaidquo chuiquinc èmbi tantiondaidquo chuiquinc caombi. Adsho tantiash: “Tantiadenquo iquec,” ma mibi quebec. ¹² ¿Èmbi chuiboed tantiadenquo icnubi padpiden chuiquin èmbi Nuquin Papan abi yacnoshon naid chuishomenda tantiatsia? ¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. ¹⁴ ¿Atotsi canuen nuquin tsusedpa Moisesën nisibimboecnuc shocosh nacnenaïd dectampampic? “Nuquin Papan chiacpadec ma aid isec nisin piaïd bëdanu,” quequin cuesten dectampampic. Adomboembidi matses cuidmenquo icnuec cuesten dectamëdendabi ëbided ciudadec unësec. ¹⁵ Èbi tantiaquido unësacsho cuidenquo icquin Nuquin Papa yacno

ëbëd tabadmenuec adendabi –quepondash Esus Nicodemo chiec.

Nuquin Papan matses abitedi tantiaquin naid

¹⁶ Aden Esusën abided cuidadec unëste chuipondash. Nuquin Papan: –Ma adec abided cuidadec unësnu –quequin Esus chomepanëdash. –Unësquoio iquec –quequin matses abitedi tantiaquidquoio icquin Nuquin Papan cudasenquoio icquin matsesmeshun aton Mado abentsëcquiobi abided cuidpanëdash. –Ëmbi adoaid con Mado tantiaquid unësacsho icsaido cuidacno nidmenquoio icquin ëbëdi tabadmendambi –quequin aton Madoded cuidpanëdash. ¹⁷ ¿Matses cuidnuenda Nuquin Papan Esus matsesmepanëdash? Padenquoio. Matses cuidenquoio icnuen napanëdash.

¹⁸ Aden aton Mado Esus tantiaquido cuidenquoio icquin Esus tantiesabo cuidendac: –Con Mado chieshëmpec –queshun. ¹⁹ Nuquin Papan matsesmiadën Esusën abi icsaid chuisho matses icsambo icquidon tantiatiapimbo iquec. Ambi icsamboen naid ëntiapimbo icquin Esus tantiatiapimbo iquec. ²⁰ Adquidon: –Ëbi icsaid Esusën utsibo tantiamenushe. “Icsambo iquec,” ëbi canushe –queshun Esus chieshëmpec. ²¹ Nuquin Papan chiacpadec tabadquidombien Esus chieshënenquoio iquec. –Nuquin Papan namiacpadec tabadquid nebique. Ma Esusën ëmbi bëdamboen naid chuibampanuna –quiash Esus tantiate bumpec.

Uan acten mentoanquidën Esus chuioaid

²² Adec Nicodemobèd onqueboshien Esus nidpondash. Edusaden yacnuèsh nidec aid nidaidèmbi Udeya caidèn capucueniondash. Abèd nidshobini Nuquin Papan chiaid Esusèn chuibampondash. Adec nidshun Nuquin Papa tantiabenquido acten mentobeniondambi.

²³ Adnubien adomboembidi con shënisiontsen acten mentobeniac caondash. Enon caid yacnoshon Sadin caid anoentsèqui chunquen diadacnoshon matses dadpen acten mentoac caondash con shënision. ²⁴ Chieshëmënkuidon quènèn nauedabi adoac caondash.

²⁵ Adnubien con shënisiobèd icquido con matses utsibèd: —Mimbi icsamboen chiec — quec chushcananac caondash. Con shënisiobèd icquido: —Uanèn Nuquin Papa tantiabenquido bédamboen acten mentobamposh —quesho tantiash: —Padenquio. Esusëmbien bédamboen acten mentobaniosh —quepac caondash.

²⁶ Adshumbien con shënisiobèd icquidon: — Nuqui chuiquid chiec nidnu. Nid —quianec nidquin con shënisio chuituidpac caondash. — Acte Odan caid uquë cuëmatsiucshun ¿mitsicquid: “Nuquin Papan chomiaid nec,” mimbi cadio? Aidèn mimbi naid dëniacquin matses dadpenquio acten mentobeniac caosh. ¿Ada bèda icpec? — caquien: ²⁷ —“Nuquin Papan chiacpadomboen Esusèn nash. Adomboembimbi naic,” queshun Esus chieshëntiapimbo iquendabi. ²⁸ “Nuquin Papan chomiaidpenquieni nec,” quequin mibi chiondambi. “ ‘Nuquin Papan chomiac bédamboshë icquid choendac,’ quequin bëyuc choshon aid chiec nebi,” quiondabi mibi chiec.

29 “Ëmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh? Padenquio. Bënëbëd nidmiash bëdambo yacbimboec Esusbëd nidanesho isash bëdambo iquebi. ³⁰ Ëmbibi Nuquin Papan chiacpadomboen Esus tantiamequin ënquin chuibanuc ëmbi acten mentoaido daëdpactsëc yanendac. Ëmbi chuiboedquio Esus tantiaquidoen dadpenquio yanendac. Aidquio bëdamboshë iquec —quepac caondash con shënisio abëd icquido chiec.

Nuquin Papa yacnuësh choquid chiaid

³¹ Adshumbic con shënision naden chuipac caondash. —Esusquio bëdamboshë iquec. Nuquin Papa yacnuësh choquid abipadquid utsi nibëdec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusëmbien ³² ambi isondaïdbëdta ambi tantiondaïdquio chuipac. Aden chiaqui matses dadpen: “Abimbo caic,” quenquio icpec. ³³ Esus tantiaquidon: “Nuquin Papa muesambo nec. Ambi: ‘Bëdamboshë icquid choendac,’ quequin dada uamepampidquio Esus nec,” capec. ³⁴ Nuquin Papan chomiaïdquio icquin Nuquin Papan chiaïdquio Esusën chuibanec. Nuquin Papan aton Mayan abëd tabadmiaïd icquin comapenen tantiaquin ismebanquin chuibanec. ³⁵ Ambi tantiaïdquio icsho aton Papan abitedishun Icbombo icmiac. ³⁶ Adnuc: “Abitedishun Icbombo Esus nec,” quequin aton

Mado tantiaquido unësacsho Nuquin Papan abëdi tabadmendac padpidec unësenquio icnuc. Esus chieshënquidoen Nuquin Papa yacno isenquio yec icsaido cuidquiacno nidendac –quequin con shënision chuipac caondash.

4

Acte uequid chido Esusën chiaid

¹ Esusbëd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: –“Uan acten mentoanquidën naid dëniacquin Esusën matses dadpenquio acten mentobanosh,” quiosh –queshun Esus chieshëmpac caondash. ² Esusën nainquio icnuc ëmbimbo nasho isun chiaqui aden Esus chieshënac caondash. ³ –Mibi adosh –cac: –Con nidaidën nidnu –quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

⁴ Aid podquedën nidequi nidaid utsi yacno Samadia caid yacno nidpondash. ⁵⁻⁶ Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: –Ëbi unësan nëid tied: “Con na nec,” cata, mado –quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquiobi: –Tiboquenu –quec Esus tsadtuidpondash. ⁷⁻⁸ Adec tsadtuidnubini: –Pete bedtanu –quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus

tsadsho istuidpaccondash. Choshobien Esusën: — Acte beccho. Acnu, champi —caquien: ⁹ —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. — Samadia yacnocquidbëd onquesambo isadaidbo nec —quequin tantiec adac caondash.

¹⁰ Adshobien Esusën badedquio cuembo chienquio icquin chuipac caondash. —Nuquin Papan bëdamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bëdambo icmianquid mibi acmetsiambi —quepac caondash Esus. ¹¹ Adoaquien acte uequid chidon actembo ca danquin: —¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëducquio iquec? ¿Mitsimbo acte bëdambo icmianquid ueshun ëbi acmetsia? ¹² Nëid acte nuquin tsusedpa Acobon uëdëshcapampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquio icquin nai? ¿Bëdamboshë icquid icquinda mimbi acte bëdamboshë icquid ëbi acmepatsia? — capondash acte uequid chidon. ¹³ Adoaquien: —Nëid acash mibi bundoaic. ¹⁴ Ëmbi acmiac mibi bundoenquio ictsiac. Acte bëdambo icmianquid acmiac ënëdenquio yec tabadquid mibi yantsiac — quepac caondash Esus badedi cuembo chienquio yec. —Ëbi tantiaquidobëd con Mayan tabadmiaç bëdambo yanec unëscasho ëbëdi tabadmendambi —quequin tantiec adac caondash.

¹⁵ Adsho tantiashun padpiden acte ca danquin: —Adquidquio ëbi acme. Bundoenquio yec nëmbo

acte uec choenquo ictsiabique —caquien: ¹⁶—Min bënë bedtan —capac caondash Esusën. —Nuquin Papan chomiaidquo yec comapenen tantiaquid mibi nec —camenuen adoac caondash. ¹⁷—Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. ¹⁸ Dada médante auc abentsëctedquiobi min bënë icpadenec. Aidon mibi niambudnian nēbi mibëd icquid min bënëpenquo nec. Abimbo mimbi caic —quepac caondash Esus.

¹⁹ Adsho tantiash: —Isambobi comapenen tantiaquidien mibi nechitec. Mibipadquidquo chiec: “Nuquin Papan chomiaidquo nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiape? ²⁰ Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. ²¹ Adsho tantiashun Esusën: —Tantia. Mibi bëdamboen chuinu. Nēbi nëid macuësh dapanshunuidtsëqui Nuquin Papa tantienquo icquin Edusaden yacnoshonuidtsëqui tantienquo icquin nidaid utsi-utsiec yacnoshon adembidi Nuquin Papa tantiabedendac. ²² Min matsesën Nuquin Papan chiaid daëdpactsëc tantiatsëcshun Nuquin Papa bëdiactsëc tantiatsec. Con matses isadaïdbombien Nuquin Papan chiaid dadpen tantiashun: “Nuquin Papan chomiaid nuquin matses bëdambo icmianquid nuquin matsesën tishendac,” quequin bëdamboen

tantiec. ²³ Nëbien utsin-utsinquien muainquo icquin: “Con Icho nec,” quequin Nuquin Papa tantiendac. Ambi chiacpadec bëdamboec tabadsho isash: “Adquid ëbi tantiaquidquo nec,” quetsiash Nuquin Papa. ²⁴ “Nuquin Papa tantiaquid ictiadquo iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac — quepac caondash Esus acte uequid chido chiec.

²⁵ Adsho tantiash chido: —“Nuquin Papan mases bëdambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuqui tantienquo yaidtedi tantiametsiash. Aidbimboecquidien mibi nechitec —caquien: ²⁶ —Mimbi chiaidquibini nec —quepac caondash Esus chido chiec.

Esus Samadia yacnocquido chiec tabadaid

²⁷ Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquo onquec. —¿Atotsi chiec chidobëd onquo? —cainquo iccondambi Esus. ²⁸ Adec ëbi chonobi tëchu nianec acte uec choquid chido nidpondash aton mases chiec shubuno nidec. ²⁹ —Isec cho. Ëmbi isacmaid dadan ëmbi naid abitedi chioishi. ¿Nuquin Papa yacnuësh choquid Quidistu caidta nioshe? En isec cho —catuidac: ³⁰ —En isnu. Nid. Aidien nechitashe. Isnu —quianec mases dadpen cho-chopondash.

³¹ Aido choabi icnubi: —Në pete, Icho — ëmbi caquien: ³² —Padi. Mimbi tantienquo yaid con na utsi iquec —quepondash Esus

petepenquio chiequi. ³³ Adsho tantiashini pete ca danec: —¿Utsibonda pete bëshumpash? — quecuededpondac ëbitedi. ³⁴ Adsho tantiash Esus: —Ëbi cuishoncamete utsi iquec. Ëbi chomiondaid Nuquin Papan chiacpadomboen naic bëdambo iquebi pete piacbimboec. Ambi chiaidtedi nainuec dayacquio iquebi —quepondash. ³⁵ Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nëmbo icquidon ëbi tantiabempec? Padenquio. “Nëidon Esus tantiendac,” mimbi cacmaidobi cho-choeque. Is. ³⁶ Acte uequid chido ëmbi chuiboedën chiac matses dadpen cho-choeque. Chuiбанuna. Ëbi tantiash Nuquin Papabëd tabadtequid yanendac. Adsho isash nuqui cuishonquendac piucquid bedashbimboec. ³⁷ Tied icbon: “Con na peta,” cac ambi nidtsinacmaid matsesën bedec. ³⁸ Aden ambi nitsinacmaid bedacbimboen mimbi naic. Utsibomba Nuquin Papan chiaid chuiбанëdaido nëmbo icquido mimbitsen chuiбанec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiбан —capondash Esusën abëd icquido chuiquin.

³⁹ Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. ⁴⁰ Cho-choquimbi badedi: —Ëbi yacno ushquin chiec cho

—quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. ⁴¹ Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. ⁴² Adashic acte uequid chido chiec: —Mimbi chuishouidi tantiaboedëmbi nëmbi aidënquio chuisho bëdamboen tantiaquioc. “Nuquin Papa matses bëdamboen ismequid nec,” quequin tantiembi—quiampondash Samadia yacnocquido dadpen.

Chuiquid dapan mado Esusën bëdamiaid

⁴³ Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. ⁴⁴ —Ëmbi chiacpaden abi caniondacnoshon Nuquin Papan chiaid chuibanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. ⁴⁵ Adsho isun: —Tantiesa nendac —Esusën caboedombi abi bëdiactsëc tantiatsëccondash. —¿Choecta icco? Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

⁴⁶ Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac

caondash. ⁴⁷ Adashic: –Esus Udeya yacnuësh choac caoshe. Istanu –quianec chopac caondash unëstiadtsëcquio icquidën papa. Adec Esus yacno choshombien: –Con mado unëstiadtsëcquio iccoshe. Bëdamec cho –caqui ⁴⁸ nidenquio yec abi datsidadquido chiec: –Ëbimbo mimbi tantienquio iquec. Ëmbi bëdameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec –quepondash Esus.

⁴⁹ Adec onqueshobien abi niachidanquin pad-piden: –Baded cho. Con mado unëstiadtsëcquio iccoshe –capondash. ⁵⁰ Adoaquien Esus: –Padi. Min mado unësenquio ye. Nidec nid –quesho tantiash: –Abimbo caic –quianec nidpondash. ⁵¹ Adec nidquimbi abi chiuuec cho-chosho aton yuabo bëquedac caondash. Aden bëquedacqui yuan: –Min mado bëdanosh –quesho tantiashun: ⁵² –¿Mitsimbo ushë icnuc con mado bëdanosh? –cac: –Ënden ushë yaquëduidtsëcnubi da una yantsëcnubi bëdanosh –quepac caondash aton yuabo. ⁵³ Adsho tantiash: –Adënquioshendabi: “Min mado unësenquio ye. Nidec nid,” caposh Esusën –quepac caondash unëstsemboedën papa. Adshun: –Nuquin Papan chomiaidquio yec comapenen tantiaquin nabanquidquio Esus nec –quequin aton shubun icquidobëdtambi Esus tantiapac caondash. ⁵⁴ Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bëdamequintsen Esusën ismepondash.

5

Esusën dada icsatsaid bēdamiaid

¹ Yuecquio ictanec Esus: –Edusaden yacno cuēdēnuec nuquin matses cho-choeque. Nuquitsen nidnu. Nid –quianec nidanepondash.

² Shubu dadpen icquid Edusaden caid dacuenadquin daquēnē uaid puduedte shēcuē dadpen icnuc abentsēc obeca puduedte caid icpondash. Aid anoentsēqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mēdantetedi icpondash.

³ Acte nēnantanquio icnuc dacuenadquiec shubumpi tabadquidēn matses dadpen tabadpondash daicsaidouidquio. Bēshuaido yec capuenquio icquido yec canite tsasiaido yec quec tabadpondash. ⁴ –“Nuquin Papan abi yacnoshon uaid mayan bēdan tēccuascaid acten abia mentoadquid bēdanquid,” quedeneque. Tēccuascaic ma chobono –quiash cainec tabadpondash.

⁵ Adnubien Esusën ěnden caniaidquio ambobi uesho istuidpondash. ěndenquimboshē aton dada icsabudash seta dadpen 38tedquiobi matamec capuenquio yec icsabudtsaidquio nepondash.

⁶ Adsho istuidshun: –ědenquio daicsabudaid nec –quequin tantiashun: –¿Bēdanteda bune? –catuidpondash Esusën. ⁷ Adoaquien: –Ai

¿mitsipadequini bēdampe? ěbi bēdiactsēcquio nidnuc utsiba badedquio mentoadteniosh. ěbi buanquin mentoquid nibēdec –quepondash daicsatsaid. ⁸ Adshobien Esusën: –Min ushte nacentanquin buanec nid –cac⁹ badedquio aton

dada bēdantanquin aton ushte buanec nidpondash. Aid ushē chonoadenquio icte ushē niondash.

¹⁰ Aden buanshobien con matses chuiquidon: —¿Chonoadenquio icte ushēnda ushte buampaid? Chonoadte ushēmbien ushte buanquid. Tsused-pabon dada uapampid ma mimbi niacpayoc — quequin chushcapac caondash. ¹¹ Adoaquien:

—Ēbi bēdameboedēn: “Buanec nid,” cac mambi naiyoc —quepac caondash Esusēn bēdameboed.

¹² Adsho tantiashun: —¿Tsuntsin naosh? —caquien:

¹³ —Tsaudi. Ēmbi isacmaid ěmbi isquiambobi bad-edquio nidaccosh matses dadpen icnuc —quepac caondash bēdameboed.

¹⁴ Adshumbic Nuquin Papa tabadte shubu uashunaid daquēnē uacno puduedshun ambi bēdameboed daicsacboed Esusēn istuidpondash. Istuidshumbien: —Tantia. Mibi chuinu. Ēmbi bēdameboedquio mibi neque. Mimbi icsamboen naid ěnash bēdambo icta. “Nuquin Papan cuidquiac bēdanenquio yec daicsabudquiochitomane,” quiash adta — capondash Esusēn.

¹⁵ Adoaquien bēdameboed abi: “¿Tsuntsin naosh?” caboedo chiec nidpac caondash.

Nidshumbic: —Ēbi bēdameboed Esus niosh — quequin chuituidpac caondash. ¹⁶ Aden chuisho tantiatanequien: —Chonoadenquio icte ushēnuidi bēdamepac caosh. Icsambo iquec —quequin con

matses chuiquidon Esus chieshēmpac caondash.

¹⁷ Adnubien: —Mibi adosh —quesho tantiashun abi chieshēnquido istuidshun Esusēn naden chuipondash. —Mimbi Nuquin Papa caid con Pa ěnenquio icquin matses nashunquidquio nec.

Adecbidi ënenquo icquin matses nashunquidquo nebi. Chonoadenquo icte ushëmbidi con Pabëdtan adoquid nebi —quepondash Esus. ¹⁸ Adsho tantiatanequien: —“Chonoadenquo icte ushën naquid icsambo iquec,” nuqui caboedquo: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquo nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshënquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquo. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. ²⁰ Ëbi tantiaquin Con Pan ambi naidtedimbo ëbi tantiamec. Ambentsëqui nainquo iquec. Aidën tantiamiacpadomboen bëdiactsëc naquin nëid capuenquo icquid bëdamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. ²¹ Con Papadquidquo yec unësaid uincuemequidquo nebi. Matses ëmbi tantiaidotedi ëbëdi tabadmenuen uincuemendambi. ²² ¿Ëbi tantiesabo cuidnuen ambiuidtsëqui chuiquidta con Pa nedic? Padenquo. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icsho cuidnuna,” caindambi con Pa. ²³ Aidëmbi: “Ëbi tantiacpaden ma con Madotsen bëdamboen tantianu,”

queshun aden matses cuidte chuiquid icmiondashi. Ëbi adquid icmiondaid icsho ëbi tantiatiapimbo icquidon ëbi chomiondaid Nuquin Papat-sen tantienquo iquec. ²⁴ ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësacsho cuidenquo icquin ëbëdi tabadmendambi. Cuidtequid icboedi ëbi tantiash ëbëdi tabadtequid yanendac —quepondash Esus.

²⁵ Adashic padpidec onquec: —Tantia. Mibi padpiden chuinu. Unësaidën tantienquo yac bimboen ëbi tantienquo icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësacsho uincuemeshun ëbëdi tabadmendambi. ²⁶ Con Pan icmiacpadequi unësaid uincuemequid nebi. Abibi unëstiapimbo icquid icquin unësaid uincuemequidquo con Pa nec. Ambi icmiacpadquiequi abi yacpadquidquo iquebi. ²⁷ Adec unëstiapimbo iccondaiddi matsesash icsaisambo icsho Con Pan matses icsaido cuidquid icmiondashi. ²⁸ Ëbi adsho tantiashun: “¿Abimbobida capeba? Muequien nechitec,” ëbi cainda. ¿Muectabi nedi? Padenquo. Con Pan tantiacpadënquo ëmbi cuënac unësaidotedi uincuenendac. ²⁹ Adec uincuenacsho ëbi tantiaquido ëbëdi tabadmequin ëbi tantiesabo icsaido cuidacno nidmendambi. ³⁰ Ëmbentsëqui nainquo iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquo icquin Con Pa bëdambo icmenuen aidën chiacpadomboen naimbi —quepondash Esus abi chieshënquido chiec.

Utsintsen ëbi chiec, quequin Esusën chiaid

31 Adshumbic Esusën abi chieshënquido chuiopondash. —Nuquin matsesën naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” quesho tantiashun: “Abimbo mimbi caic,” mimbi ëbi catiapimbo iquec. 32 Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. 33 Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. 34-35 Aden chieshtoenquio icquin bëdamboen chuipadenec. Chuisho tantiatsash mibi bëdambo icuidtsëcondac. “Ëmbi Uan padon naid chuisho tantiashun: ‘Abimbo mimbi caic,’ ëbi capashun. Ëbi adosho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiactsëc tantiamequin chuipadenec. ¿Adquid matsesënuidtsëquidabi abimbo chuipec? 36 Con Pambien: “Con Mado neque. Matses ismenu,” queshun comapenen tantiaquidquio icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec. 37 Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo

mimbi iquec. ³⁸ Adembidi ambi dada uamequin chiampidquo ma mimbi bēdamboen tantienquo yoc. Aid bēdamboen tantiashumbien Nuquin Papan chomiondaid ēbitsen mimbi tantiatsiac. ³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquo nebi. Aid isbanquid yec Nuquin Papabēd tabadtequid nebi,” mibi quepec. Ma ēbimbo chuiquin Nuquin Papan dada uamepampid neyoc. ⁴⁰ Aden dada uamepampid isbanquidombi mimbi ēbi tantienquo iquec. Ēbi tantiashoembi mibi Nuquin Papa yacno ēbēd tabadmetsiandac. ⁴¹ “Ēbi adsho tantiashun ma matsesēn ēbi: ‘Bēdambo mibi iquec,’ canu,” ¿quectabi ique? Padenquo. Con Pan chiacpadomboen nanuembimbi aden chioc. ⁴² Ēbi tantienquo icscho isun: “Nuquin Papa tantiesabo nec,” quequin mibi tantiembi. ⁴³ Ēmbien Nuquin Papan chiacpadomboen naic. Aden nasho mimbi ēbi tantienquo iquec. Utsi: “Nuquin Papa yacnuēsh choquid nebi,” quec muaquidien mimbi badedi tantiatsiac. ⁴⁴ Mibibi tantiadec: “Mibi bēdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bēdambo iquec,” cametiapimbo iquec —quepondash Esus abi chieshēnquido chiec.

⁴⁵ Adashic padpidec: —¿Ēmbentsēquidambi: “Ēbi tantiesabo neque. Cuidnuna,” quequin mimbi naid Nuquin Papa chuipe? Padenquo. Mimbi tantiaidēnquo Moisesēntsen: “Nēido icsambo iquec,” mibi caindac. ⁴⁶ Aidēn chiampid bēdamboen tantiaquimbien mimbi ēbi tantiatsiac.

Aidën chiampidi mabi neyoc. ⁴⁷ Aden Moisesën chiampid tantienquo icquin ëmbi chuiboedtsen mimbi tantiatiapimbo iquec –quequin Esusën abi chieshënquido chuipondash: –Moisesën chiampid tantiaquidquo nebi –quequido chuiquin.

6

*Esusën pete uatanquin 5000tedi pemaiad
(Mat 14.13-21; Mad 6.30-44; Duc 9.10-17)*

¹ Yuecquo ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash. ²⁻³ Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bëdamesho isboedo Esus isnuec cho-chopondash. ⁴ Nuquin Papan isadaidbo unës uainquo icquin matamiampid inchësh tantianuec pec tabadte ushë nëbi yanuc niondash.

⁵ Aido cho-chosho istanequien Esus: – Uedipe, piucquid buanshun ¿mitsimbo pete bedtane nëido pemenu? –quepondash Uedipe chiec. ⁶ –¿Atoda queque? Tantianu – quiash adpondash Esus. –Pete bedabi icnuc ëmbibi pete uanu –quequin otacquo tantiequi adondash. ⁷ Adoquien Uedipe: –Ma aidtedquo pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac

aidtedquoio pemiadenquoio ictsiash –quepondash Uedipe.

⁸ Adnubien Andedesën Petedon utsin: ⁹ –Ma nē madompin panēmpi 5tedtsēc icpayoc, Icbo. Nuēcquidēmpi daēdquiobi ictsec. Matses dadpenquoio iquec. Aidedtsēcquid pemetiapimbo iquec –caquien ¹⁰ Esusën: –Padi. Aidi bēdambo iquec. Abitedi: “Nēmbo tabad,” caban –cac: –Nēmbo tabad –cabanac sebad-sebadpambo icquidēn uasinēn matses dadpenquioshē tabadbudpondash. Dadauidtsēqui tambanac 5000ted icpondash. Chido bacuēbobēdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipondash. –Pete uaquid yec mibi bēdamboshē iquec. Mimbi uaid nēid pete bēdambo iquec, Papa –quec onquetanquin: –Meneban –cac abēd icquidon tabadquido abitedi menebampondash. Adotanquimbic nuēcquidēmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. ¹² Aden ambi piactembi pebededacshobien Esusën: –Napi uaid secainda. Sandoshon dayun ua –cac ¹³ tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

¹⁴ Aden pemiaquien pemiaido: –Comapenen tantiaquin Esusën pete dadpenquoio icmiac. Moisesën chuipampidshenda nepec. “Nuquin Papa pan bēdamboshē icquid chomendac,” capampidshenda nepec. Aidien nuqui chuiquid dapa icmetiad –quepac caondash Esus tantiamenquoio yec.

¹⁵ Adsho ambembi tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(*Mat 14.22-27; Mad 6.45-52*)

¹⁶ Esus cuembon inchëshbudtsëqui chian budondabi ëbitedi. ¹⁷ —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. ¹⁸ Adnubien cunquequid dapa cunquetuidpondash. Acte comapenec tēcguasquenuc ¹⁹ uncadenquio yampondash. Ënapen nidabi nëbi 6 quidometedos cactiontsëqui nidshun isquien matseshimboec acte bëntse chopec. Adsho istanec dacuëdquiondabi. ²⁰ Adshobini: —Ëbi neque. Dacuëndenda —capondash. ²¹ Adoac: —Esus nec —quetanquin badedi antsadtomiondambi. Aid antsadtometanquin badedquio potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aidbëd nidenquio icpaboc. ¿Mitsimbo nidpash? —quepac caondash pemiaido. ²³ Adnubien shubu dadpen icquid Tibedias caid yacnocquidon cano dadpen bë-bëpac caondash. Pete pemebocno anoentsëqui nando-nandosh isash: ²⁴ —Potequimbien Esusën yashe. Nëid

canobi antabëdtoshon potenuna –quetanec antabëdtoshon potiac-potiacpac caondash.

Potiac-potiacash Capednaun yacno pudundoshon ²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: –¿Mitsipaden potio, tsusio? –caquien: –Naden –quenquoio yec: ²⁶ –Tantia. Mibitedi chuinu. ¿Ëbimbo tantianucta chodio? Padenquoio. Ëmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimbi ëbi nibëneyoc. ²⁷ Peteuidtsëqui tantiaquin pete bednuen naquidquoio ma mibi neyoc. Aidquoio chodquetequid nendac. Chodquetiapimbo icquid tantiaquin bëdamboen nata. Aden nash ëmbi icmiacpadquiec Nuquin Papabëd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi –quepondash Esus. ²⁸ Adsho tantiash: –“Nuquin Papan chiacpadomboen nata,” quepequien mibi iquiec. Adomboen natiadquoio icquin ¿atotsimbi nape? –caquien: ²⁹ –Nuquin Papan chiacpadomboen natiadquoio icquin ambi chomiondaidquoio tantiata –quepondash Esus ambi pemiaido chiec.

³⁰ Adoaquien: –¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimbi ëbi ismepatsia?

³¹ “Ëndenquimboshë pete nibëdacnoshon Moisesën con tsusedpabo nibëdbëdi sequiaid pete pemi-anepampic,” quequin dada uapampid isombique.

Adquid nacnenquin ëbi isme —quepondash pemi-aido peteuidtsëqui tantiec. ³² Adoquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquio iquec. ³³ Aid petebimboecquidën matses bëdambo icmetsiash pete piac bimboecnuc —quepondash Esus abibi cadequi.

³⁴ Adsho tantiash petembo ca danec: —Ënenquio icquin adquid ëbi pemeta —quepondash pemiaido ambi peboeuidtsëqui tantiec. ³⁵ Adshobien

Esusën: —“Ëbiuidtsëqui petebimboecquid icquin matses bëdambo icmequid nebi,” caimbi. Ëbi tantiaquid ënenquio icquin bëdambo icmendambi petebëdi acte bundoenquio yac bimboecnuc.

³⁶ Ëmbi chuibocpadomboen ma mimbi ëbi tantienquio icboc. Ëmbi comapenen tantiaquin nabansho isumbi ma mimbi ëbi tantienquio icboc. ³⁷ Utsibombien ëbi tantiendac. Nuquin Papan tantiamiaidtedishun ëbi tantiasho bëdamboen isquin cacumenquio iquendambi.

³⁸ ¿Ëmbi tantiacpadomboen naquidtabi nedi? Padenquio. Nuquin Papan chiacpadomboen nanuec mabi abi yacnuësh chondac. ³⁹ Aden

aidën chiacpadomboen nanuen ëbi tantiaquido unësacsho uincuemeshun cuidenquio icquin ëbëdi tabadmendambi. Unësaid abitedi uincumete ushën adoendambi. ⁴⁰ Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

⁴¹ Adec: —Nuquin Papa yacnuësh chon daid

yec petebimboecquid nebi —quesho tantiashien con matses chuiquido: ⁴² —¿Adquidida nepec? Ma icsamboen chuipayoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmédquid neyoc. Ma Osen mado neyoc. Anitsen tantiembi. Matsesën tishaid Nuquin Papa yacnuësh choquid ictiapimbo iquec —quecuededpondash.

⁴³ Adshobien Esusën: —Shoshquetsëcquin ëbi icsamboen chienda. Abimboembi caoc. ⁴⁴ Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësacsho unësaid uincuemetete ushën uincuemendambi. ⁴⁵ Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bëdamboen iste matses tantiamendac,” quequin chuipampic. Aden Nuquin Papan tantiamiaido ëbi tantiaquido yantsiash. ⁴⁶ “Ambi tantiamiaidën matsesën Nuquin Papa ispash,” quenquio iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaiddi matsesondabi —quepondash Esus: —Matsesi nec —abi caquido chiec.

⁴⁷ Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi. ⁴⁸ Petebimboecquid icquin aden tabadmendambi. Adecbidi bëdamboec tabadmianquid nebi. ⁴⁹ Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo

icquid yanabi. ⁵⁰ Petebimboecquid utsien Nuquin Papa yacnuësh chondaïd nëmbobi iquec. Aid piash ëmbi chiacpadquiec padpidec unësenquoio yec Nuquin Papabëd tabadtequid yanendac. ⁵¹ Adquidquoio nebi. Con nami piash matses unëstiapimbo icquid yanendac. Adquidquoio matses icmenuec ëbided cuidadquin con nami menendambi –quepondash Esus ompoacbimboen chiec. –Ëbi tantiaquido nëbi bëdamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc –quequin tantiec: –Petebimboecquid icsho ëbi piash matses unëstiapimbo icquid yanendac –quepondash Esus. –Ëbi tantiaquido cuidmenquoio icnuec ëbided cuidadec unësendabi –quequin tantiec: –Con nami menendambi –quepondash Esus.

⁵² Adec: –Con nami piash matses unëstiapimbo icquid yanendac –quesho tantiashien namimbo ca danec con matses chuiquido onquecuededpondash. Utsi-utsiec: –¿Mitsipaden Esusën aton nami nuqui pemepatsiash? Aidquoio tantiatiapimbo iquebi –quecuedednubi utsi-utsiec: –¿Atotsi chuitiadquoio yec niosh? Chuisho tantianu –quecuededpondash. ⁵³⁻⁵⁴ Adsho tantiashun Esusën ambi chiacpadomboembidi chuioapondash. –Tantia. Mibi chuinu. Matses tantiaquidquoio nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bëdamboec tabadquid yanash Nuquin Papabëd tabadtequid mibi yanendac. Adquid icsho

unësaido uincuemetete ushënquoio uincuemendambi ëbëdi tabadmenuen. Ëmbi chiacpadomboen nainquoio yash Nuquin Papabëd tabadtiapimbo mibi iquendac. ⁵⁵ Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididiquec con nami icsabudec ëbided cuidadec unësaid tantienquoio yec mibi bëdamboec tabadtiapimbo iquendac. ⁵⁶ Aden ëmbi namibëdta intac chuisho bëdamboen tantiaashun ëmbi chiacpadomboen matsesën natiadquoio yanendac. Adsho isun aaidbëd tëshnanenquoio icquin bëdamboec tabadquid icmendambi. ⁵⁷ Nuquin Papa unëstiapimbo icquid yec matses uincuemequidquoio nec. Aidën chomiac ambi namiacpadomboenuidi naquin ëbi tantiec tabadquid unësacsho uincuemequin unëstiapimbo icquid icmendambi. ⁵⁸ Aden ëmbi naid tantiamenuc: “Nuquin Papa yacnuësh chondaid petebimboecquid utsi iquec,” quiobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquoio nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac ⁵⁹ — quepondash Esus Nuquin Papan chiaid chuibante shubunuësh Capednaun yacnuësh.

Abi tantiauidquidon Esus nianondaid

⁶⁰ Adec: —Con nami pequinc con intac acquinc cash mibi bëdambo ictsiac —Esus quesho tantiaashien abëd icquido utsi-utsiec: —Aidën chiacpadomboen natiapimbo iquebi. Icsamboen

chiec –quepondash Esus tantiamenquoio yec.
⁶¹ Adec onquesho ambembi tantiash Esus onqueoapondash. –¿Embi chuiboed tantiash chieshtotiadquioda ique? ⁶² Nuquin Papan matesmiaid yequi unēsash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec. ⁶³ Namimbo intacquiobëdta ca danequien mibi nec. ¿Namimbo pequinc intacquoio acquinc cashta mibi bëdambo icpatsia? Padenquoio. Nuquin Papan Mayanën ëmbi chuiboedbëdta ëbi tantiamequin mates bëdamboec tabadquid icmetsiash. Adoaid unēsash Nuquin Papa yacno ëbëdi tabadtsiash –quepondash Esus cuembo chiec. ⁶⁴ Adashic padpidec: –Embi aden bëdamboen chiaqui utsin-utsinquien mimbi ëbi tantienquoio yanendac –quepondash abi tantiauidquido chiec. Aido tauamboec abëdi nidnuc: –Nëidën ëbi tantienquoio yanendac. Nëid utsin ëbi chieshënquido ëbi bedmendac –quequin ambembi Esusën tantiapanëdash.

⁶⁵ Adashic padpidec: –Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatipimbo iquendac. Nuquin Papan tantiamiaidënquien ëbi tantiatsiash,” quequin chiombi –quepondash Esus. ⁶⁶ Adsho tantiashun dadpenshun Esus nianondash. ⁶⁷ Aden nianaquien Esusën abëd icquido 12ted icquid chuipondash. –¿Mimbitsendabi niampe? –caquien ⁶⁸ Petedo: –Padenquoio. ¿Tsudabëd icnuendambi mibi nianuc? Mibipadquid utsi nibëdec. Mimbuidtsëquien:

“Ëbi tantiaquid bēdamboen isquin unēsacsho uincuemeshun ëbēdi tabadmendambi,” quequin chuipoc. ⁶⁹ “Abimboen caosh,” quequin mibi tantiembi. “Nuquin Papa yacnuësh chonēdaid yec bēdamboshē icquidquien nec,” caombi mibi. Mibi niantiapimbo iquebi –quepondash Petedo Esus caic. ⁷⁰ Adoaquien Esus: –Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adondaaid abentsēc Satanāsēn namiaidquio yec icsamboshē iquendac –quepondash Esus. ⁷¹ –Simon Iscadioten mado Udasēn ëbi chieshēnquido ëbi bedmendac –quequin ambembi tantiash adondash Esus.

7

Aton utsibon Esus tantienquio yaid

¹ Abi tantiauidquidon nianac Cadidia yacnouidi yuec Esus capucuenepondash. –Nidaid Udeya caid yacnocquido con matses chuiquidon ëbi cuesunetiadquio iquec –quiash Udeya yacno nidenquio icpondash. ² Adnubien con matses abitedi: –Edusaden yacnuësh cuēdēntanu –quiampondash. Adanec nidaid utsi Udeya caidēn nidec 7tedec ushec cuēdēnuec matses dadpen nidacno Edusaden yacno nidanepondash. Cuēdēnuec Esus nidenquio icpondash. ³ Adec nidenquio icsho isumbien aton utsibon: –Edusaden yacno nidec nid. Mibēd ictiadquio icquid ano icnushe. Comapenen tantiaquin nabanquin aido ismec nid. ⁴ ¿“Ma matses dadpenshun ëbi tantianu,” quequinda matses daēdpactsēc yacnoshonuidi napec? Matses

dadpen yacno nidshun comapenen tantiaquin nabanquin ismec nid —capondash aton utsibon. ⁵—Nuquin Papan chomenēdaidquio nec —quequin tantienquio icquimbi adopondash aton utsibon.

⁶Adoaquien Esus: —Mates dadpen nidnuc nidtiadquio yec mibia nidta. Abitedishun isnuc nēbi nidtiapimbo iquebique. ⁷Mibien anocquidon chieshēntiapimbo ye. Mibia nidta. “Nuquin Papan chiaid niac-niaquec mibi icsaic,” ěm̃bi cac chieshēnondashibique. ⁸“Cuesunenushe,” quiash nēbi nidtiapimbo iquebique. Mibia nidta. Nuquin Papan tantiacpadec nidendabi ⁹—quiash anobi Cadidia yacno Esus tabadpondash.

Esustsen Edusaden yacnuësh cuēdēnuec nidaid

¹⁰Aden aton utsibo nidanemiash yuec-yuecpactsēc ictanec abitsen Esus nidpondash Edusaden yacnuësh cuēdēnec nidec. Abitedi ismenquio yec tsyuec Esus nidpondash.

¹¹Adnubien con mates cuēdēncuededacnoshon abi chieshēnquidon Esus nibēmpac caondash. —¿Mitsimbo icpec? ¿Ada nēmbo chosh? —quequin chuibenepac caondash. ¹²⁻¹³Adsho tantiash con mates Esus chieshēnquido dacuēdēnec utsibo tantiamenquio yec sho-shoshquetsēcquiec onquepac caondash. Utsi-utsiec: —Ēsus bēdamboshē icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chonaidini nec,” quec ma muequi neyoc —quec onquecuededpac caondash.

¹⁴Adnubien con mates cuēdēnec taēbon abentsēc choec ushash Nuquin Papa tabadte shubu uashunaid daquēnē uaidēn Esus

puuedpondash. Puduedshumbic Nuquin Papan chiaid chuibampondash. ¹⁵ Adsho tantiash: —¿Mitsipaden tantiashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶ Adsho tantiash Esus: —Ëmbembi chienquo icquin ëbi chomiondaidën chiaidquo chiec nebi. ¹⁷ Nuquin Papan chiacpadomboen natiadquo icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquo chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. ¹⁸ Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquo ma matsesën tantianu,” quequin ambi chiaidquo chiendac. ¹⁹ Mimbien adoenuquo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquo dada uapampic. Ëbi: “Cuesunenu,” caquin aidën chiaid ma mimbi niacniaqueyoc —quepondash Esus abi chieshënquido chiec.

²⁰ —Mimbi ëbi: “Cuesunenu,” caoc —Esus quesheo tantiashumbien ano tabadquidon: —Podobitsi icsa dapuedash mibi tantiadenuquo yec onquepec. ¿Tsuntsin mibi cuesunepatsiash? —capondash. ²¹ Adoaquien Esus: —Nëidën ëbi cuesunetsiash —quequin chienquo yec: —Chonoadenuquo icte ushën comapenen tantiaquin

dada bédamepondambi. Aden bédamiacsho isash: “Adopenshenda naic. Chonoadenquo icte ushèn daicsatsaid bédamequin Nuquin Papan chiaid niac-niacposh,” ma mibi quepondac.

²² ¿Ëmbentsëquidambi chonoadenquo icte ushèn nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquo ictaneshun adembidi Moisesëntsen adopampic. Nëbi adembidi naic chonoadenquo icte ushëmbi chonoadquimbi ma mimbi shui dëbid dëteshuneyoc. ²³ Aden

Moisesën chiampid niaquenquo icquin shui nacnenquin mimbi bédamboen naic. Ëmbitsen daicsatsaid dada abichobi bédamequin mambi bédamboen naondac. ¿Atotsi quequin ëbi chushcai?

²⁴ Chonoadenquo icte ushèn dada bédamequid icsho: “Icsambo mibi iquec,” mimbi ëbi capec. Aden ëbi bédamboen tantienquo icquin mimbi icsamboen chiec. Ëbi bédamboen tantiaquioshon ëmbi naboed bédamboen chui –quepondash Esus abi chieshënquido chiec.

Esus bedshun cuesunetiad, cauidaid

²⁵ Adec Esus: –Chonoadenquo icte ushèn naondambi –quesho tantiashien anocquido Edusaden yacnocquido nadec onquecuededpac caondash. –Nuqui chuiquidon: “Cuesunetiad,” caboedien

nëid nechitec. ²⁶ En is. Abi chieshënquidobëdi tabadquin chieque. Chuisho ma chuiquidon chushcainquio icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien ²⁷ aidobidi: —Nuquin Papa yacnuësh choquid ictiapimboen aid iquec. Abi caniacno tantiemi. Nuquin Papa yacnuësh choquid abi caniacno tantiadenquio ictsiash —quepondash ano tabadquido.

²⁸ Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isondaïd nec. Aton nidaïd Cadidia caid yacnuësh caniquid nec,” ¿quequindabi bëdamboen tantiapadi? Ma mimbi padenquio yoc. Ëbemi chondaidpenquio nebi. Ëbi chomiondaïd abi iquec. Ma mimbi aidquiobi tantienquio yoc. ²⁹ Ëmbien aidquio tantiendac. Aidbëd tabadondaïdquio nebi. Adsho aidën: “Nid,” cac chondaïd nebi —caquien ³⁰ —“Con pa Nuquin Papambo nec,” quechitequien nec —qeshun abi chieshënquidon: —Cuesunemenuembien bedtiad —quetanquin: —Bednu —caqui bedadenquio icpondash. —Nëbi ma Esus unës uainquio icnu —Nuquin Papa quenuc bedmenquio icquin Esusën mëtampanëdash. ³¹ Esus cuesunetiadquio icnubien utsibon dadpenshun Esus tantiabempondash. —Nëïdpadquid utsi nibëdtsiandac. Nuquin Papan chiaïd chuiquin nuquin tsusedpabon dada uapampicpadomboen comapenen tantiaquin Esusën matses bëdamebamposh. Nuquin Papa yacnuësh choaid Quidistu caid Esus nec —quequin

dadpeshun Esus tantiabempondash.

Ëbi istuidenquo iquendac, quequin chiaid

³² Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abëdtan chuiquid utsibo chuipac caondash. —Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abëd icquido sondado chuiquin: —Baded bedtan —capac caondash.

³³ Adoac nidanequin tantiatuidaquien nadece Esus onquepondash. —Yuec-yuecpactsec mibëd icashic ëbi chomiondaidbëdtsen tabadoaic nidendabi. ³⁴ Ëbi nibënquin ëbi istuidenquo mimbi iquendac. Ëbi nidacno mibi nidtiapimbo iquec —quepondash Esus.

³⁵ Adsho tantiash abi chieshënquido: —Nuqui istuidmenquo icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuipatsiash? ³⁶ Tantiadenquo yec onquepec. ¿Atotsi quepec? “Ëbi nibënquin mimbi ëbi istuidenquo iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

Aton Mayan abi tantiaquidbëd tabadmete chiaid

³⁷ Adnubien cuëdë nec ënëdte ushënquiobi con matses abitedimbo cuëdë nuec cho-chopondash. Cho-choash tabadbudnubien nidtoash comapenec onquequin Esusën chuipondash.

—Acte natia bunachimboec Nuquin Papa tantiatae bunquin ëbi bëdamboen tantiata. ³⁸ Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi. Adoac mibëd tabadquin mibi bëdamboen tabadmequin utsibotsen Nuquin Papa tantiatae bumetsiash —quepondash Esus. ³⁹ —Nuquin Papabëdta ëbi tantiamequidquo Nuquin Papan Mayan nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰ —Nuquin Papa tantiatae bunquin ëbi tantiata —Esus guesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien ⁴¹ utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? ⁴² Padenquo. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo

nec –quepac caondash. ⁴³ Adec dadpen: – Bëdambo icquid nec –quenubi aideddbidi: – Icsambo iquec –quepac caondash. ⁴⁴ Adnubien: –Icsambo iqueque. Cuesunemenuembien bedtiad –queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵ Adnubien: –Esus bedtan –caboedo sondado bedabi Esus chieshënquido chiec chopac caondash. Chosho: –¿Atotsi quiash bedabi cho? –caquien: ⁴⁶ –Ma bëdamboenshë chuiboc. “Adomboen chuibanquid utsi nibëdec,” queshun bedtiapimbo iccobi –quesho ⁴⁷ tantiashien: –Aid muasho tantiashun: “Abimbo caic,” ¿cainda icco? ⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquio iccosh. ⁴⁹ Utsibombien tantiash. Adquidon ëmbi bëdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec –quepac caondash con mat-ses chuiquido padiseyobo Esus chieshënec.

⁵⁰ Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash. ⁵¹ –¿Abibi chuimiabida cuidpec? Nuquin Papan chuipampid nad iquec. “ ‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash –quepac caondash Nicodemo abëdtan chuiquid utsibo chiec. ⁵² Adoaquien chuiquido: –Esus yacpadec Cadidia yacnuësh caniquid mibi nepanui.

Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquio choenquio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic.⁵³ —¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

8

Bënëpenquio chudmequid cuënoten seshunetse- naid

¹ Nicodemo chushcabon Esus macuësh dapa Odibos caid yacno ushec nidondash. ² Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash.

³ Aden chuinubien con matses tsusiobon aton bënëpenquio chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquio nitsimpondash. ⁴ Adshumbien Esus chuipondash. —Aton bënëpenquio chudmesho istuidshun nëid bëombi. ⁵ Nuquin Papan chiaid Moisesën naden dada uapampic. “Aton bënëpenquio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido. ⁶ —¿Atotsi Esus quepatsiash? Nuquin Papan chiampidquio chienquio icsho:

“Mimbi icsamboen chiec,” catiad –quish adondash. –¿Adembidida mimbi tantie? –caquien Esusën ëcbedenquo icquin shuebudshun mëdanten nidaid dada uapondash. ⁷ Adshobien padpiden: –¿Adembidida tantie? –cado-cadoac niddotanec: –Nuquin Papan chiaid niaquesambo icquin en mimbia cuënoten se –quetanec ⁸ padpidec shuebudshun mëdanten nidaid dada uaoapondash.

⁹ Adnubien: –Nuquin Papan chiaid niaquesambo icquin en mimbia cuënoten se –cac: –Nuquin Papan chiaid niaquesamboen nibëdchitec. Setiapimbo iquec –quetanec nidanepondash. Tsusioboba nidanebon caniabotsen tsyuec nidanepondash chidouidtsëqui Esusbëd icnuc. ¹⁰ Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: –¿Mitsimbo nidosh, champi? ¿Mibi cuënoten sequidta nibëdosh? –Esusën cac: ¹¹ –Ai, nibëdosh –quesho tantiashien: –Ëmbimbo mibi cuënoten senquo iquembique. Mibi icsaid ënash bëdamboec tabadec nid, champi –capondash Esusën. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshëncuëdo tantiamequin padpiden chuioapondash. –Pabiate cuembo icnuc con Pan bëdamboen iste matses tantiamequidquo nebi. Ëmbi tantiamiac ëbi tantiaquido icsateuidi bunenquo yanec bëdamboec tabadte

buncuenendac. Adec ëbëd tabadtequid yanendac
—quepondash Esus.

¹³ Adsho tantiash abi chieshënquido:
—Mibentsëqui: “Adquid nebi,” qesho
tantiatiapimbo iquebi. Muequien mibi nechitec.
Mates daëdshun chiac bëdambo ictsiash —
quepondash. ¹⁴ Adsho tantiash Esus: —Ëbibi
abimbo cadebi. “Con Pa yacnuësh chondash
anobidi nidendabi,” quec muainquo iquebi.
“Aton papa yacnuësh choash anobidi Esus
nidoaindac,” quequin ma mimbi ëbi tantienquo
icboc. ¹⁵ Cadidia yacnuësh choquid matesuidien
mimbi ëbi danec. Adquid danquin mimbi
icsamboen chiec. Ëmbien abimbo chiec.
Abimbo chuiquid icquin: “Nëid icsambo
iqueque. Cuidnuna. Nëid bëdambo iqueque.
Cuidenquo icnuna,” quequin nëbi chienquo
iquembi. ¹⁶ Aden chuiquin abimbo chuitsiambi.
Ëmbentsëqui chienquo icquin ëbi chomiondaid
Nuquin Papabëdtambi chuiquin abimboshë
chuitsiambi. ¹⁷ Nuquin Papan chiaidquo
Moisesën naden dada uapampic. “‘Icsaosh,’
quequin daëdshun chuisho tantiash: ‘Abimbo
chiec,’ quequid yendac. Adecbidi: ‘Bëdambo
iquec,’ quequin daëdshumbidi chuisho tantiash:
‘Abimbo chiec,’ quequid yendac. Abentsëcshun
chuishoen mua caquid yendac,” quequin Nuquin
Papan chiaidquo Moisesën dada uapampic.
¹⁸ Aden Moisesën dada uampid tantiashun
ëmbentsëqui chienquo iquembi. Ëbi chomiondaid
con Pabëdtantsëqui chiembi —quepondash Esus.

¹⁹ Adsho tantiashun abi chieshënquidon: —

¿Mitsimbo papa icpec? –capondash. Adoaquien: –Con Pa ëbêdta ma mimbi tantienquio icboc. Ëbi tantiaquimbien mimbi con Patsen tantiatsiac –quepondash Esus abi chieshênquido chiec. ²⁰ Abi chieshênquido onquecuededec quênên tabadnubi aid quênê cachoctsêqui Nuquin Papa tantiaquin piucquid menequin nauedte tabêcacoshon Esusên chuipondash. Adec Esus anoentsêqui tabadsho abi chieshênquidon bedabi icpondash. Nuquin Papa: –Ma ëmbi tantiacpadênquio matsesên unês uanu –quenuc Esus bedabi icpondash.

Utsibon Esus tantiauidaid

²¹ Adnubien Esusên abi chieshênquido padpiden chuiopondash. –Nidendabi. Ëbi nidan ëbi nibênquin mimbi ëbi istuidenquio iquendac. Ambi chiaid niac-niacquido icsho Nuquin Papan bédamboen isambobi mibi unêsendac. Adash ëbi nidacno mibi nidtiapimbo iquendac –quequin chuipondash Esusên. ²² Adsho tantiash Esus chieshênquido: –¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? –quepondash abi chieshênquido. ²³ Adsho tantiash Esus: –Mibi matses nec. Ëbien con Pa yacnuêsh chondaidquio nec. ²⁴ “Adquid icsho ëbi tantienquio icquid unêsacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bédamboen isabi mibi unêsendac,” mibi caombi –quepondash Esus.

25 Adsho tantiash abi chieshënquido: —
 ¿Mitsipadquid icquin ëbi aden chie? —
 quepondash Esus caic. Adoaquien: —Ëmbi
 chianeboedquiobi mabi neyoc —queoapondash
 Esus. 26 Adashic padpidec: —Mimbi naid dadpen
 chuiquin mibi cuidte chiendambi. Ëmbembi
 chienquio icquin ëbi chomiondaid muesanquio
 chiaidquio chiendambi. Aidën chiaiduidi
 matses abitedi chiendambi —quenubien
 27 Esus chieshënquidon: —Abi chomiondaid
 Nuquin Papambo nec —quequin tantienquio
 icpondash. 28 Aden tantienquio icsho isun Esusën
 padpiden chuiopondash. —Matsesmiadquio
 icshobi ëbi cuesten dectanshumbic mimbi ëbi
 tantiabenendac. “Ambi chiacpadquidshenda
 nepadenec. Ambembi chiaid chienquio
 icquin aton Papan chiaidquio chuiquin aidën
 chiacpadomboenshenda napadenec,” quequin
 ëbimbo mimbi tantiendac —quepondash Esus.
 29 Adashic padpidec: —Nëbi ëbi chomiondaid
 ëbëd iquéc. Aid bëdambo icmenuen ambi
 chiacpadomboen nasho isun ëbi nianenquio
 iquéc —quepondash Esus.

30 Adsho tantiashun: —Abimboen Esusën caic.
 Nuquin Papa yacnuësh choquidien nec —queshun
 Esus tantiauidtsëcondash dadpenshun.

Satanasën yuabo nec, quequin Esusën chiaid

31 Adsho isumbien Esusën abi bëdiactšëc
 tantiauidtsëcboedo chuipondash. —Ëbi
 tantiaquidën ëmbi chiacpadomboen natiadquio
 iquendac. 32 Nuquin Papabëdta ëbi aden
 tantiasho icsamianquidën yua icboedi aidën

yuapenquo mibi icmetsiambi –quepondash Esus abi tantiauidtsëchoedo chiec. ³³ Adec Esus: –Yua –quesho tantiashien: –Abadauan yampidën tsyuecquido yec utsin yuacmaido nebi. Tantienquo icquin mimbi icsamboen chiec. ¿Atotsieshun: “Mibi yuapenquo icmetsiambi,” quequin ëbi chio? –capondash abi tantiauidtsëchoedon Esus chuiquin.

³⁴ Adoaquien: –Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bëdambo icti-apimbo iquec. ³⁵ ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶ Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac –quepondash Esus.

Satanasën madobimboecquido chiaid

³⁷ Adshumbic Esusën abi chieshënquido chuoapondash. –“Con tsusedpa Abadauan icpampic,” quequin mimbi abimbo chioc. Adboedëmbi ëbi cunesunetiadquo mibi iquec. Ëmbi abimbo chuisho tantiate bunenquo icquin ëbi cunesunetiadquo mibi icpec. ³⁸ “Con Pabëd tabadquin isondambi,” quequin ëmbi bëdamboen chuisho tantienquo icquin min papabimboecquidën chiacpadomboen mimbi naindac –quepondash Esus abi chieshënquido chiec. ³⁹ –Min papabimboecquidën chiacpadomboen mimbi naindac –queshobien: –Con

tsusedpa Abadauanën nacpadomboen mambi napaboc –capondash Esus chieshënquidon. Adoaquien Esus: –Ma mimi adoenquo yoc. Abadauanën nacpadomboen naquin mimi bēdamboen natsiac. ⁴⁰ Bēdamboen natiapimbo icquin mimi ēbi cuesunetiadquo iquec. Nuquin Papan chiaidquo abimbo chuīsho mimi adotiadquo iquec. Nuquin Papan chiaid tantiec ma Abadauan cuesuniantiapimbo icpampiyoc. ⁴¹ Min papabimboecquidēn namiacpadomboen naquidien mimi nec –capondash Esusēn abi chieshënquido chuiquin. Adoaquien: –Mambi Nuquin Papauidtsēqui tantieyoc. Utsi tantiatiapimbo icquin Nuquin Papauidtsēqui con pa caimbi –quepondash Esus chieshënquido.

⁴² Adsho tantiashien Esus: –Nuquin Papambo tantiaquimbien mimi ēbitsen tantiatsiac. Ēbemi choenquo iccondabi. Nuquin Papan: “Matsesbēd tabadec nid,” caquini chondac. Adoaid icsho Nuquin Papa tantiaquidēn ēbitsen tantiatsiash. ⁴³ ¿Mitsipadquid yec ēmbi chiaid tantiash: “Tantiadenquien icpec,” quepe mimi? Ēmbi abimbo chuīsho tantiate bunenquo yec pamumēdacbimboec mimi iquec. ⁴⁴ Min papabimboecquid Satanas nec. Aid bunacpadenuidi mimi natiadquo iquec. Ēndenquimboshē Nuquin Papan tauamboen matses uanubi min papabimboecquid cuesunianquidquo nepampic. Aton padibi nec. Nuquin Papan chiacpadomboen namenquo yec chieshēnec muaquidquo nec. Aton padibi icquid yec matses muamequidquo nec. Aidēn

madobimboecquin mimbi ëbi tantiatiapimbo icpec. ⁴⁵ Ëmbi Nuquin Papan chiaidquo abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquo yaquien bëdambo ictsiash. Mabi icsambo icquidpenquo neyoc. ⁴⁶ ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquo mimbi icpe? ⁴⁷ Nuquin Papa tantianuequidën Nuquin Papan chiaidquo chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec –quepondash Esus abi chieshënquido chushcaic.

Esus chieshënquido cuënoten siantiadpambo yanaid

⁴⁸ –Nuquin Papa tantiesabombo ma mibi neyoc –Esus qesho tantiashien abi chieshënquido: –Ma mibi podobitsi icsa dapudedash neyoc. Tantiadenquo yec mibi onquec. Samadia yacnocquidobimboec icsamboshë ma mibi iqueyoc –caquien ⁴⁹ Esus: –Mabi podobitsi icsa dapudedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquo abimbo mimbi chiec,” catiadquidi mimbi ëbi: “Muec nec,” capec. ⁵⁰ “Mabi: ‘Bëdambo iquec,’ canu,” quenquo iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi

cuidendac. ⁵¹ Tantia. Mibi bēdamboen chuinu. Ēmbi chiacpadomboen naquidquio unēsenquio ictsiash —quepondash Esus ompoacbimboen chiec. —Ēbi tantiaquido unēsacsho uincuemeshun Nuquin Papa yacno ēbēdi tabadmendambi padpidec unēstiapimbo icnuc —quequin tantiec adondash.

⁵² —Unēsenquio ictsiash —quesho tantiash Esus chieshēnquido: —Ma mimbi tantiadenquio icnuc chuipayoc. Adsho: “Mayan icsa dapuduedashien nec,” mibi caombi. “Ēmbi chiacpadomboen naquidquio unēsenquio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bēdamboen isaidombo abitedi unēspampic. ⁵³ ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴ Adoaquien Esus: —Ēmbembi: “Mabi: ‘Bēdambo iquec,’ canu,” quequin ēmbi nac icsambo ictsiash. Mimbi: “Aiduidtsēqui tantiembi,” caboedēmbini: “Nēid con Mado Esus bēdambo iquec,” quequin ēbi comapenen tantiaquin namec. ⁵⁵ “Tantiembi,” mimbi caboed Nuquin Papa ma mimbi tantienquio yoc. Ēmbien Nuquin Papa tantiaquiec. “Aid tantienquio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. ⁵⁶ Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuēsh choash bēdambo icmianquidquio matsesbēdi tabadendac,” quequin tantiec

cuishonquepadenec. Nuquin Papan tantiamiac
 ëbi aden tantiapadenec –quepondash Esus.
⁵⁷ Adsho tantiashun Esus chieshënquidon: –Ma
 mimbi min seta 50tedi matamiambo yoc. Adash
 ma mibi tsusiobudabi iqueyoc. Abadauanën
 mibi tantiatiapimbo icpampic –caquien ⁵⁸ Esus:
 –Abimbo caimbique. Tantiata. Abadauan
 tishabi icnubi ëndenquimboshë ictenebi. Nuquin
 Papapadquidquio nebi –quepondash Esus.
⁵⁹ Adsho tantiash nëishtanequien: –¿Icsamboenda
 chuipec? ¿Nuquin Papada muauapebac? –
 quetanquin cuënote dapa bedtanequin: –
 Seshunenu –cac siadenquio yec ompodanec
 cuempondash Esus.

9

Esusën bëshuaid bëdamiaid

¹ Yuecquio ictaniash chonoadenquio ichte
 ushën capucuenequin Esusën dada bëshuaid
 istuidpondash. Anin bëshuacshobi tishnëdaid
 niondash. ²⁻³ Aid istuidshumbimbi: –En chui,
 Icho. Tantanu. ¿Atotsieshun Nuquin Papan bëshu
 uapanëdash? ¿Aton papabëd ani icsasho isun
 Nuquin Papan cuidquin bëshu uanëdaidta nepec?
 –caquien: –Padenquio. Utsi icsasho isun Nuquin
 Papan nambo icpanëdash –quepondash Esus.
 Adsho tantiashun padpiden: –¿Tishabi icnubi:
 “Abibi icsaindac,” quequin tantiashun Nuquin
 Papan bëshu uanëdaidta nepec? –caondambi.
 Adoaquien: –Padenquio. “Abibi icsaindac,”
 quequin tantiashun Nuquin Papan bëshu
 uambo icpanëdash. “Ma con Madon comapenen
 tantiaquin ismenu,” quequin ambi tantiacpaden

Nuquin Papan bëshu uapanëdash. Adoacsho anin tishnëdaid nec. ⁴ Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoadesa –quepondash Esus. –“Con Pan tantiaidtedi nainabi unëshmane,” queshun unëshabi icquin con Pan chiaidtedi nainendambi –quequin tantiec: –“Nainabi inchëshmane,” quiash comapenec chonoadnuna –quiondash Esus. ⁵ Adashic: –Matsesbëd icquin Nuquin Papa bëdamboen tantiamequidquo nebique. Nëidtsen tantiamenu ⁶ –quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷ Adotanquimbic: –Acte tiquidimbo icquid Sidoe caidën bëpamëdec nid –cac nidash bëpamëdtanec bëdamboen isec aton shubuno nidpac caondash. Aid acte con onqueten Sidoe quequin buanaid caic. ⁸ Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: –Bëshuaid nebique. Piucquid beccho –quedonetsec tsadtsëcsho isboedontsen istuidpac caondash. Istuidshun: –¿Nuqui isboedquiobida nepec? “Beccho,” ¿quedoneboedquiobida nepec? –cabededpac caondash. ⁹ Utsi-utsiec: –Ai, aidquiobi nec –quenubi utsibo: –Padenquio. Aidbimboecquidien nec –quesho tantiash: –Aidi nebi –quepac caondash bëshuacboed. ¹⁰ Adsho tantiashun: –¿Mitsipadec bëdano? –caquien: ¹¹ –Esus caidën bëdamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe

caidën bēpamēdec nid,” cac nidash bēpamēdec bēdanobi. Nēbi bēdamboen isembi —quepac caondash bēshuacboed. ¹² Adsho tantiashun: — Mibi bēdamequid ¿mitsimbo iquec? —cac: —Tsaudi —quepac caondash bēshuacboed.

Bēshuaid bēdameboed chuimaid

¹³ —Bēdamioshi —quesho tantiashun: — ¿Abimboda capec? Ma con chuiquidon chuimenu — quequin padiseyobo yacno bēshuacboed buampac caondash. ¹⁴ Buanacshobien padiseyobon: — Chonoadenquoio icte ushën nac caosh —quequin tantiaquin: ¹⁵ —¿Mitsipadec bēdano? —caquien: —Esusën nidaidbēdta uicchun cabiunshun bēbitaccac bēpamēdec bēdanshun nēbi bēdamboen isembi —quepac caondash bēshuacboed.

¹⁶ —Bēpamēdec bēdanobi —quesho tantiashien chuiquido onquecuedepac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquoio ictsiash. Chonoadenquoio icte ushën nēid bēdamequin ma Nuquin Papan chiaid niac-niacpayoc — quenubien utsibo: —¿Nuquin Papa tantiesanda aden bēdamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquoio icquin ¹⁷ bēshuacboed chuipac caondash. —Mibi bēdamequid ¿tsutsi mimbi cape? —caquien: — Nuquin Papan: “ ‘Yuecshun naden naindambi,’ quequin chiaidquoio chuiquidien nec,” caimbi —quetanec bēshuacboed nidpac caondash.

¹⁸ Aid nidnubien Esus chieshënquido: — Bēshupenquien niash. Muequien niashe. Anibēdta amē chuimenun chomenuna —quetanquin

19-20 chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bëshuacshobida tishonda? —capac caondash. Adoaquien: —Ai, bëshuacshobi tishonda nec —ani queshobien: — Bëshuaid ¿mitsipadec bēdanosh? —capac caondash. ²¹ Adoaquien: —Tsaudi. Bēdansho isambo iccombi. ¿Tsundambien bēdamechitash? Dada ěnden caniaid neque. Aidi chuime —quepac caondash bëshuacboedĕn tita amĕbĕdi. ²² — “Nuquin Papa yacnuĕsh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuĕdec: ²³ —Dada ěnden caniaid neque. Aidi chuime —quepac caondash.

²⁴ Adoac padpiden bëshuacboed chomeoapac caondash padiseyobon. Chomiash: —“Nuquin Papan bēdamioshi. Nuquin Papa bēdambo iquec,” ¿quecta icco? Ma Esus Nuquin Papan chiaid niacniacquid neyoc. Ma icsamboshĕ icquid neyoc — quepac caondash. ²⁵ Adsho tantiash bëshuacboed: —Icsamboshĕ icquidien Esus nechitec. Aden tantienquio iquembi. Mabi bēdameboc. Isenquio icboedĕmbi mambi nĕbi bēdamboen iseyoc. Ade-nuidtsĕqui tantiembi —quepac caondash. ²⁶ Adsho tantiashun: —¿Mitsipaden mibi bēdamiosh? —caquien: ²⁷ —Mambi mibi chuipaboc. Ma mim-bimbobi tantienquio icboc. ¿Atotsi quequin pad-piden: “Ĕbi chui,” cai? ¿Esus tantiatiadquioda icti? —capac caondash bëshuacboedĕn.

²⁸ Adsho tantiash nĕishtanquin chushcapac caondash. —Mibi Esus tantiaquidquio nec. Mibi icsambo iquec. Ĕbien nuquin tsusedpa Moises

tantiaquidquo nec. ²⁹ “Moisesien Nuquin Papan chuiquin namepampic,” quequin tantiembi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquo neyoc –quepac caondash chuiquido. ³⁰ Adoaquien bëshuacboed: –¿Abida cai? “Dadpenquo tantiembi,” ma mibi quepaboc. Adboedi: “Ëmbi tantiacmaidquo nec,” ¿quecta ique? Mimbi tantiacmaidëmbini bédamiosh. Ma bédambo yoc. ³¹ Abi icsaid ënabi icquidën chianesho Nuquin Papan tantienquo ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. ³² Anin bëshuacshobi tishaid bédamenquo ictenec. Adquid bédamequid nibëdpadenec. ³³ Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc –quepac caondash bëshuacboed. ³⁴ Adsho tantiash nëishquioshon: – Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda – quequin cuemepac caondash. Aden Esus chieshënnquidon bëshuacboed Nuquin Papan chiaid chuibante shubun padpiden puduedmenquo icpac caondash.

Ambi bédameboed istuidoashun Esusën chiaid

³⁵ Adnubien: –Mimbi bédameboed cuemiac caosh –quesho tantiashun Esusën ambi bédameboed istuidpondash. Istuidshumbic: – Nuquin Papan matsesmiaidquo caic: “Nuquin Papa yacnuësh choquid nec,” ¿quequinda

mimbi tantiape? –capondash Esusën ambi bëshuaid bédameboed chuiquin. ³⁶ Adoaquien: –¿Tsutsi neque? Isnu –cac: ³⁷ –Ëbi nec. Mibi bédameboedi nebi –caquien: ³⁸ –Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec –quetanec ismenuec danëshën tinquebudpondash.

³⁹ Adsho isumbic Esusën matses abi datsidasho chuipondash. –Nuquin Papa matses bédamboen ismequid nebi –quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatipimbo icquin Nuquin Papa tantienquo iquec –quepondash Esus. ⁴⁰ Adsho tantiash nëishtanec: –¿Nuquin Papa tantiesabodabi nedi? –quepondash Padiseyobo. ⁴¹ Adsho tantiashien: –Nuquin Papa tantiesambo icsho ëmbi tantiamiac Nuquin Papabëdta ëbi tantiasho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec –quepondash Esus abi chieshënquido chiec.

10

Obecabimboecquido chiaid

¹⁻² Adshumbic abi chieshënquido Esusën padpiden chuiopondash ompoacimboen chuiquin. –Tantia. Mibitedi chuinu. ¿Mitsipaden

nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquio obeca icbo puduedquid. Daquënë uaid mayadec puduedquidien ampequid nendac. ³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. ⁴ Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan. ⁵ Utsibon cuënaquien tsibanenquio yec dacuëdec cuenquid obeca. Icbouidtsëqui tsibanquid obeca nec –Esus qesho tantiashien: ⁶ –Tantiadenquio yec mibi onquec –quepondash Esus chieshënquido.

⁷ Adsho tantiashun Esusën chuipondash. –Tantia. Mibi bëdamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰ Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bëdamboen dayun uaquin bëdamboec tabadquid icmendambi. Aido unësacsho uincumeshun Nuquin Papa yacno ëbëdi tabadmendambi. Adec ëbi bëdambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquio

iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquo icquimbi ëmbi chiaiduidtsëqui tantiendac –quepondash Esus abi chieshënquido chiec.

Ëbi tantiaquido dayun uaimbi, quequin chiaid

¹¹ Adashic Esus padpidec onqueoapondash. — Obeca icbobimboecquid nebi. Ichocudasacbimboec ëbi tantiaquido cudasnuec ëbided cuidadec unësendabi. ¹²⁻¹³ Utsiboen adenquo ictsias. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquo nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquo nianacbimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquo iqueyoc –quepondash Esus abi chieshënquido chiec.

¹⁴⁻¹⁵ Adashic abi onquec: —Ëmbien matses bëdamboen tantiamequin ëbi tantiaquido dayun uaindac. Nuquin Papabëd ëbi tantiananacpadquiec ëbi tantiaquidobëdtsen tantiananquiebi. Aden ëbi tantiaquido tantiec Nuquin Papa cuidmenquo icnuec ëbided cuidadec unësendabi. ¹⁶ ¿Nëid matses isadaidboidtsëqui tantiectabi adec unëspadi? Padenquo. Matses utsibontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bëdamboen dayun uaindami. ¹⁷ Con Pan tantiamiacpadec

ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquiec. Unësash ëbembu uincuenendabi. ¹⁸ Matsesën ambembu ëbi unës uatiapimbo ictsiash. Ëmbi tantiacpadquiequi matsesën unës uadendabi. Adecbidi uincuentiadquio yec ëbembu uincuenendabi. Aden con Pan namiacpadomboen naindambu –quepondash Esus.

¹⁹ Adsho tantiasu con matses chuiquido nadec onquecuededpac caondash. ²⁰ Esus chieshënquido: –Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi –quenubien ²¹ utsibo: –Podobitsi icsa dapuduedashta ¿adec onquepatsiasu? Bëdamboequien onquiosu. ¿Podobitsi icsa dapuduedaidënda aden bëshuaid bëdamepatsiasu? Bëdambo icquidëmbien adotsiasu –quepac caondash.

¿Quidistu caidta ne? quequin chiaid

²² Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. ²³ Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capuondash. Aid quënë cachoc: “Sadomonën nacnenaaid nec,” caondash. ²⁴ Ambo Esus capusho isashien con matses chuiquido

Esus natia datsidadshun: –En sebadënquoio chui. Tantiënquoio yec tsadiapimbo iquebique. Mimbi cuembo chuisho tantiatiadquoio iquebi. ¿Nuquin Papan chomiaid Quidistu caidta ne? –capondash con matses chuiquidon.

²⁵ Adoaquien Esus: –Mambi mibi chuipaboc. Ma mimbimbobi ëbi tantiënquoio icboc. Con Pan: “Adota,” cac comapenen tantiaquin nabandeniombi. Mibi bédamboen tantiamenuen adodeniombi. ²⁶ Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantiënquoio iccoc. Nuquin Papan tantiamiabi yaido icquin mimbi ëbi tantiatiapimbo iquec. ²⁷ Con Pan tantiamiaidien ëbi tantiaquid yanendac. Adshun obecan aton icbo tsibanacximboen ëmbi chiacpadomboen natiadquoio yanendac. ²⁸ Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” queshun bédamboen dayun uaindami. Ëmbi adoacsho bedshunacximboen icsambo icquidën yuaquin Nuquin Papan cuidtequido icmeotiapimbo iquendac. ²⁹ Con Pansen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënichictiapimbo iquendac. ³⁰ Aden ëbi bedshuntiapimbo icquin con Patsen bedshuntiapimbo iquendac. Con Papadquidquoio nebi –quepondash Esus.

Cuënoten seshunetiadpambo yanoaid

³¹ –Nuquin Papapadquidquoio nebi – Esus quesho tantiash nëishtanquin cuënote

dapa bedshun abi chieshënquidon Esus seshunetiadquo icoapondash. ³² Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? — quepondash Esus. ³³ Adoaquien: —¿Bëdamboen nabanshodambi: “Mibi seshunenu,” cadì? Padenquo. “Con Papadquidquo nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiashumbimbi mibi seshunec —quepondash abi chieshënquido.

³⁴ Adshobien Esusën: —Nuquin Papan chiaidquo nuquin tsusedpan naden dada uapampic. “Nuquin Papa nadec onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. ³⁵ Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” queshun mimbi chushcambo iquec. Nuquin Papa adoambobi ¿ëbida chushcai? ³⁶ Nuquin Papan namiacpadec abi yacnuësh chonaid nebi. Adquid yec: “Nuquin Papan Madombo nebi,” quiobi. Ëbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. ³⁷ Ëmbi chiaidquo tantiatiapimbo icquimbi ëmbi naidquo tantiata. Ëmbi Nuquin Papan namiacpadomboen comapenen tantiaquin

nabanenquio icsho isun mimbi ëbi mua catsiac.
³⁸ Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquiobidien Esus nec,” quequin mimbi tantiabentsiac — quepondash Esus.

³⁹ Adsho tantiash padpidec nëishtanquin abi chieshënquidon: —Bedchitono —caqui bedadenquio icpondash. ⁴⁰ Adashic acte Odan caid potiaash con shënision tauaquin matses acten mentodenecno Esus nidoapondash. Ambo ëbi chedobëdi tabadpondash. ⁴¹ Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴² Adshumbic: —Nuquin Papa yacnuësh choquidien Esus nec —quequin Esus tantiabempondash.

11

Dasado caid unësaid

¹ Udeya yacnuësh Esus cuembon Dasado Esusën utsibimboecquid unëstiadtsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ² Madian aton manëdaidën ucbanquin Esus tanoshcabi icnuc

adec aton utsi unëstiadtsëcquio yanac caondash. ³ Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquio unëstiadtsëcquio yanoshe. En isec cho —catuidpondash. ⁴ Adoaquien Esus: —Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bédambo iquec. Ambi chomiondaid aton Madombotsen bédambo iquec,’ quenu,” queshun naindambi —quepondash. ⁵ Adbosh Dasado aton chuchubédta tantiaquidquio yequi ⁶ badedquio nidenquio yec anobi daëdec ushpondash Esus.

⁷ Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. ⁸ Adoaquimbi: —Icho, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. ⁹⁻¹⁰ Adoaquien cuembo chienquio icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacbimboen con Pan tantiaidtedi nainabi icsho ëbi unës uatiapimbo iquec. Inchëshën uebudacbimboen ambi tantiaidtedi nainshobini ambi tantiacpadënquiobi matsesën ëbi unës uaindac —quequin tantiec adondash Esus.

¹¹ Adshumbic Esusën padpiden ompoacbimboen chuioapondash. —Ëmbi con utsi caid Dasado ushtoaccoshe. Isucumec nidnu. Nid —quesho ¹² tantiashini: —Ma ushnu. Ushash isucunquid —quepondac. ¹³ Esusën Dasado

unësaid chuinubi Dasado ushe dantsëcondambi.
¹⁴ Adnubien Esusën sebadënquoio chuipondash.
 –Dasado unësaccosh. ¹⁵ “Bëdamec nidtiadquidi niobi” ¿quepectabi ique? Padenquoio. Mibi caic: “Ma nëidon ëbi bëdamboen tantianu,” queshun Dasado unëso istanambo iccombique. Nëbi mibi ismec nidnu. Nid ¹⁶ –caquien: –Ai, abëdquiobi unësec nidnu. Nid –quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemequidquo nebi, quiaid

¹⁷ Adashic unësacno anoentsëqui Esus chopondash. Choshon: –Unësacsho chococash daëd-daëdquieci ushobi –quetsëcquieci onquecuededsho tantiatuidpondash. ¹⁸⁻¹⁹ Esus choabi icnuc con matses chuiquido Dasado unësacnuësh sedenquenueci Edusaden yacnuësh cho-chopac caondash. Unësaid nëbi ictscëncuc tedes quidometedos tiontsëcquidën badedquoio cho-chopac caondash. Cho-choash unësaidën chuchubëd sedenquec tabadpac caondash. ²⁰ Adnubien: –Esus choeci –quesho tantiash Madta bëquedeci chopondash aton chibi Madia shubuno sedenquec tsadnubi. ²¹ Choequien Esus bëquedeci: –Mibi icnuc con utsi unësenquoio ictsenosh, Icho. Con utsi unësosh. ²² Mimbi chiacpadamboen Nuquin Papan nëbi natsiash –quepondash Madta: –¿Ada con utsi uincuemetsia? –quequin chuitiadquoio yequi. ²³ Adoquien Esusën: –Min utsi uincuenendaci –capondash. ²⁴ Adsho tantiash: –“Ai, yuecashi unësaido abitedimbo uincuemete ushën con utsi uincuenendaci,” quequin tantiembi –quepondash

Madta. ²⁵ Adsho tantiashun Esusën: –Ëbibi matses unësaid uincuemequidquo nebi. Ëmbi tantiacpadënquo uincuenendac. Aden ëbi tantiaquido unësacsho uincuemendambi. ²⁶ Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequinda tantie? –capondash Esusën. ²⁷ Adoaquien Madta: –Ai, adembi tantiembi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi –quetanec ²⁸ nidpondash aton chibi chiec. Nidshun: –Nëmbo cho, chibi. Chuinu –cac aton chibi choshobien: –Esus chosh. Mibi iste bunoshe. En isec cho, chibi –caquien ²⁹ Esus bëquednuec badedi choquin istuidpondash. ³⁰ Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. ³¹ Adec Madia nidsho isun chococacnobi sedencaic nide danquin abëd sedenquenuequidon tsibanampac caondash. ³² Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: –Mibi unësquo iccoc, Icbo. Bëdambo icquid mibi nec. Mibi icnuc con utsi unësenquo ictsenosh –quepondash Madia Esus caic.

³³ Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: – Ai, unësquo icnuc nec –quiash Esus abitsen shubiantiadtsëcquo icpondash. ³⁴ Adec

shubiantiadtsēcquo tsadacnuëshien Esus: —
 ¿Mitsimbo mimbi chococaye? En isnu. Nid —
 quepondash. Adoac: —En isec cho —quianec
 nidnubien ³⁵ shubinidequi nidpondash Esus.
³⁶ Adec shubinidsho isumbien: —Ma Dasado
 unësquo icnuc shubieyoc —cabampondash con
 matses chuiquidon. ³⁷ Adnubien utsibo: —
 ¿Atotsieshun bëshuaid bëdamiondaidëmbi Dasado
 unëso bëdamenquo icposh? —quepondash.

Esusën Dasado uincuemiaid

³⁸ Nidquimbi chococacno istuidequi Esus
 shubiantiadtsēcquo yanoapondash. Nidaid
 cuënoteuidpambo icquid macuësh tsimpiduc
 shëcuë uaidën unësaid nauedshun cuënote dapan
 bëtinaacnuësh shubiantiadtsēcquo iccondash.
³⁹ Adashien Esus: —Cuënote bidiacquin shëcuë
 shëcne —quepondash. Adsho tantiaash unësaidën
 chuchu Madta: —Padi. Ënden pisenashe.
 Chococash mabi daëd-daëdquiec ushboc —
 quepondash. ⁴⁰ Adoaquien Esus: —Dacuëndenda.
 Mambi mibi chuiboc. Mimi: “Nuquin Papan
 Madombobien mibi nec,” ëbi casho: “Ëmbi
 comapenen tantiaquin nabansho mimbi
 isendac,” mambi mibi capaboc. En na. Baded
 bécune —cac ⁴¹ cuënote shëcuë bëtinaid shëcnequin
 bécunepondash.

Adsho istanquimbien Esusën abuc isquin
 Nuquin Papa chuipondash comapenec
 onquequin. —Papa, ëmbi nëbi chuisho mimbi
 tantiec. Ëmbi chuibocpadomboen mimbi naindac.
 Mibi bëdambo iquec, Papa. ⁴² Ëmbi otacquo
 chianiaid mimbi tantioc. Ëbi datsidadaido

tantiamentuen nēbi comapenec onquequin mibi chiemi. “Mibi chuitanquin ěmbi comapenen tantiaquin nabansho isun: ‘Nuquin Papan chomiaidien nec,’ quequin ma nēidon ěbi tantianu,” queshun comapenec onquequin mibi chiemi, Papa. Padi, aitedtsēqui mibi chiemi, Papa –quepondash Esus. ⁴³ Adtanquimbien comapenen cuēnquin: –Dasado, puduenec cho –capondash. ⁴⁴ Adoquien Dasado badedquio puduenanec chopondash abi dashcute dataniacchobi. Unēsacsho uesquin dashcuten datanetanquin dashcuten abi bēpucacchobi chopondash. Adec chosho istanquin: –Baded dashcute dachic. Ma nidnu –capondash Esusēn.

Nēbien Esus unēs uametiad, quiaid
(*Mat 26.1-5; Mad 14.1-2; Duc 22.1-2*)

⁴⁵ Aden Esusēn ěnden unēsaidquiobi uincuemesho isashien Madia tsibanec sedenquec cho-choboedo abentse-abentsec: –Nuquin Papan chomiaidien Esus nec –quiampondash. ⁴⁶ Adnubien utsin Edusaden yacno nidshun Esus chieshēnquido padiseyobo chuituidpac caondash. –Esusēn unēsaid uincuemiosh –quepondash. ⁴⁷ Adsho tantiatanquimbien chuiquid dapan abēdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. –¿Mitsipadotiad? Nuquin matses ismequin comapenen tantiaquin dadpen nabampac caosh. ⁴⁸ Aden Esusēn nabansho isun nuqui ěmiabi icsho nuquin matsesēn abitedishun abi chuiquid dapa Esus icmetsiash. Adnubien nuqui yuaquido Doma

yacnocquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chïc-chictsiash. ¿Mitsipadotiad Esus? —quepac caondash chieshëmënkuido.

⁴⁹ Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbi chiendac? Tantiadentsëcquio icnuc ma mimbi chuipaboc. ⁵⁰ Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esused unës uamenuna —quepac caondash chuiquid dapambo abëdtan chuiquido chiec. ⁵¹ Aden chuiquin ambembi chiambo Nuquin Papan oncamiac Nuquin Papan chiaidquio aden chuipac caondash. —Nëid setan abëdtan chuiquido chuiquid dapambo nec —qeshun Nuquin Papan aden oncamiacqui Caipas onquepanëdash. —Matses cuidmenquio icnuc con Madoded cuidadec unësendac —qeshun Nuquin Papan Caipas aden oncamepanëdash. ⁵² Aden Caipasën chuinëdaid tantiaquin ëmbitsen chuinu. Tantia. ¿Isadaidbouditsëqui cuidmenquio icnucta Esus abided cuidadec unëstiondash? Padenquio. —Matses utsitsen abi tantiaquid yansho isun abëdi tabadmenuec Esused cuidadec unëspondash —quequin tantiembi. Nëbi Caipasën chuisho tantiashun tsusiobon chiaid chuinu. ⁵³ Aden Caipasën Esus unës uamete chuisho tantiashien Esus chieshënquido: — Nëbimbobien Esus unës uametiad —quecuedepac

caondash.

⁵⁴ –Tsusiobon mibi adosh –quesho tantiatanequien chieshëmënquido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash.

⁵⁵ Epadain caid yacno tabadnubien Nuquin Papan con tsusedpabo unës uainquio icquin matamiampid inchësh tantiec cuëdënuec Edusaden yacno con matses nidanepac caondash. Cuëdë nec taëabi icnuc mishtemaid mishquidoba Edusaden yacno nidanepac caondash. –Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedeneque –quianec nidanepac caondash. ⁵⁶⁻⁵⁷ Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: –Nuqui chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh –quesho tantiashien: –¿Ada Esus chopeba? “Unës uamenushe,” quiash choenquien icchitec –quecuededpac caondash.

12

*Madia Dasadon chuchun Esus tanoshcaid
(Mat 26.6-13; Mad 14.3-9)*

¹ Aden mishtemaid mishquidon abi nibë nubien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuquin Papan

matamiampid inchësh tantiec cuëdë nec taënushi niondash. ² Ambo chosho isash: –Esus bëdambo iqueque. Pemenu –qeshun: –Pec cho –cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbëd icquid ëbi chedobi. Nëidic Dasadon chuchu daëd. Aidtedi icpondash. Adec penuec tabadsho Madtan pete menebampondash. ³ Adnubien Madian: –Esus bëdamboshë iquec. Ismenu –quetanquin bëdamboshë nuadquidën Esus tanoshcapondash. Tanoshcatanquin aton manëdaidën taucpondash. Aden tanoshcaid shubu anuestsëcquiec comapenec nuadpondash. Piucquid dadpenquo menequin bedaid niondash. Sedunten cushtoaid bëdambo nuadquid nado caid niondash. ⁴ Adsho isun Esus bedmequidën Udasën Madia chushcapondash. ⁵ –Padi. Mimbi uesquieque. Utsi uain nata. Nëid danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad –capondash Udasën. ⁶ Adomboen chuisho tantiashun Udas bëdambo icquidquo danondambi. Esusbëd icquido ëbitedishun piucquid bedshun sauedten sauedshun dayun uaquidquiemi danondac. Piucquid bëdamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: –Piucquid nibëdquidoen menetiad –quequin muaquin Madia chushcapondash. ⁷ Adshobien Esusën: –Padi. Chushcainda. Ma nanu. Ma nuquin matsesën unësaid bëdambo nuadnuc danoshcapaid yoc.

“Nèbi con Mado unèsendac,” quequin Nuquin Papan tantiamiacpadomboen ëbi unèsò chococate tantiaquin Madian ëbi tanoshcaquin naic. ⁸ Piucquid nibèdquido dadpen iquec. Nibèdenquio iquendac. Èbien mibèd icboedi nèbi nibèdquio yanendac. Èbi tantiec Madia bèdambo iquec –quepondash Esus Udas chiec aidi: –Abi chieshènquido Esus bedmenu –quepanuda.

Dasadotsen cuesunetiadquio yaid

⁹ Adnubien: –Betania yacno Esus choaccosh –cac Edusaden yacnuèsh matses dadpen Esus isec cho-chopondash. Ambobidi Dasado Esusèn uincuemiondaid icsho aïdtsen isnuéc cho-chopondash. ¹⁰⁻¹¹ Chochoshon Dasado uincuemiondaid isumbien abentsècshun abentsècshunquien: –Comapenen tantiaquin nabanquidquio yec Nuquin Papapadquidquibidien Èsus nec. Nuquin Papan chomiaidien nec –quequin Èsus tantiabempondash. Esus tantiabenshumbic abi chuiquidon chiaid tantienquio yampondash. Adsho isash nèshtanequien chuiquid dapabo: –“Uincuemiaid Dasado isun Esus tantiabenosh,” quioshe. Dasadotsembien unès uatiad –quianac caondash chieshèmènquiec.

*Chuiquid dapa ismiacimboen Esus ismiaid
(Mat 21.1-11; Mad 11.1-11; Duc 19.28-40)*

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuèsh cuèdènuéc cho-choboedon: –Esus choec –quesho tantiatanquin ¹³ niste podobiecquid bedbètsenec Esus bèquedec

cho-chopondash. Esus bëquedshumbien: —
Chuiquid dapa nec —quequin ismequin ambi
bedbëtsemboed uic-uiccabededpondash. Aden
uic-uiccaiqui:

“Mibi bédamboshë iqueque. Èbi bédamboen ista.
Nuquin Papan chomiaid yec mibi bédamboshë
iquec.

Con matses isadaidbo chuiquid dapambo mibi
nendac,”

quecuededpondash Esus caic. ¹⁴ Ambì podquedën
choquin bedbëtsemboed cabayobitsecquidëmpi
catsadtoanec Esus chosho isash adcueded-
pondash. Adec aid catsadte Nuquin Papan
tantiamiacpadomboen con tsusedpan dada
uaquin naden chuipampic. ¹⁵ “Edusaden
yacnocquido chiec:

‘Dacuëdenda, Edusaden yacnocquido.

Is. Cabayobitsecquidëmpi catsadtoanec mibi
chuiquid dapambo choeque, quepec,”

quequin Nuquin Papan chiaid dada uapampic.

¹⁶ Adec Esus catsadtoanec chosho isun aden
chuipampid tantienquo iccondambi. Esus
abuc nidambimbi ëbitedishun tantiabenondac.
—Esus chuiquinshenda nuquin tsusedpan dada
uapampic. Aidën chiacpadomboen niste podò
uic-uiccaquin: “Bédambo iquec,” quequin nuquin
matsesën Esus ismebededpondash —quequin
tantiabenondambi.

¹⁷ Esus cabayobitsecquidëmpi catsadtoanec
choabi icnuc Esusën Dasado uincuemesho
isboedon: —Uincuemesho isombi —quequin
matses dadpen chuibenepanëdash. ¹⁸ Adsho
tantiashun: —Unësaid uincuemequid Nuquin

Papan chomiaidien neque. Istanu –quianec Esus bēquedec cho-choshon aden niste podo uic-uiccaquin ismepondash. ¹⁹ –Esus bēdamboshē iquec. Nuqui chuiquid dapa nendac –quecuededsho tantiashien Esus chieshēnquido padiseyobo: –¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? –quepac caondash.

Matses utsibo: Esus isnu, quiaid

²⁰ Edusaden yacno cuēdēnec cho-choboedo matses utsibo isadaidpembotsen icpondash. ²¹ Adnubien adquido matses utsibon Esus iste bunquin shubu dadpen icquid Betsaida caid yacnuēsh caniquid Esusbēd icquid Uedipe chuituidpac caondash. –Esus istiadquio iquebi –quesho tantiashien: –Chiata. Chuitambono –quianec nidshun ²² Esusbēd icquid utsi Andedesba chuibētsenec Andedesbēd choequi Uedipe Esus chiec chopondash. –Matses utsibon mibi istiadquio iquec –caquien ²³ aid matses utsibo isadaidpembo tantiamenuc Esus comapenec onquepondash. –Nuquin Papan matsesmiondaidquio icquin nēbimbobimbi ambi chiaidtedi nainendac. Ēmbi adoacsho Nuquin Papan: “Mibi bēdambo iquec,” ēbi caindac –quepondash Esus abi unēs uate chiequi. ²⁴ Adshumbien ompoacbimboen chuipondash. –Tantia. Mibi chuinu. ¿Mitsipadquio pete ēshē chococaid icpec? Chococac caniaish bacuēec bēdambo icpaid yoc. Chococabi bēdambo ictiapimbo iquec. Adoacbimboen chococabi

yac matses bēdambo icmetiapimbo iquendabi. Unēsacsho chococac matses bēdambo icmequid nendabi —quepondash Esus. ²⁵ Adashic padpidec: —Ambi naïduidi naquin ěmbi chiaid niacquido Nuquin Papan cuidtequido nendac. Ambi naïduidi nainquo icquin ěmbi chiacpadomboen naquido ěbēdi tabadtequido yanendac. ²⁶ Adquid ěmbi chiacpadomboen natiadquio yec ěbi yacpadec chieshtoenquo ictsias. Adquidquo unēsash uincuenash ěbēdi tabadsho Nuquin Papan: “Nēid con Mado tantiaquid bēdambo iquec,” capendac —quepondash Esus.

Esusēn abi unēs uate chiaid

²⁷ Adashic abi unēs uate tantiec Esus nadpondash. —Unēsquioshē yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebī —quepondash Esus. ²⁸ Adtanequien Nuquin Papa chiec: —Nuqui tantiacpadomboen nēbi nainembi, Papa. Ěmbi aden nainacsho: “Nuquin Papa bēdambo iquec,” matses cameta, Papa —quenubien abucuēshquio Nuquin Papa comapenec onquepondash. —Ai, ěmbi nami-aid mibi icsho: “Nuquin Papan namiaid nec. Nuquin Papa bēdambo iquec,” matses camepombi. Nēbi padpiden adomeoaindambi —quepondash Nuquin Papa.

²⁹ Abucuēsh onquesho bēdamboen tantiabi yec utsibo: —Abu cuēdtoec nec —quenubien utsibo: —Nuquin Papan abi yacnoshon uaid mayan bēdan Esus chuipash —quecuededpondash.

³⁰ Adsho tantias Esus: —¿Ěbi tantiamenuecta

onquediash? Padenquoio. Mibi tantiamenuequien niosh. Aden tantiashun ëmbi bëdamboen chuisho tantiata. ³¹ Nuquin Papa chieshënquid Satanasën yuaido matses dadpenquioshë iquec. Nëbi Nuquin Papan tantiacpadomboen aido utsi-utsien Satanas bedshunëndambi: “Chën. Con na neque,” quequin. ³² Èbi abuc dectanac aden matses ëbi tantiaquid icmendambi –quepondash Esus. ³³ –Èbi cuesten dectanquin unës uaindac –quequin tantiec: –Èbi abuc dectanendac –quepondash Esus.

³⁴ Adsho tantiash abi datsidadquido: –“Èbi dectanendac,” quiosh. “Unësebi,” quepequien iccosh –quiashien Esus chiec: –“Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesën chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? –quepondash Esus datsidadquido. ³⁵ Adoquien Esusën: –Nadquid nebi –quenquoio icquin ompoacbimboen naden chuipondash. –Mibi bëdamboen tantiamequid nëbi isadenquoio iquendac. Aid nibëdnuc bëdamboen mimbi tantienquoio iquendac. Nidabi aidën chuisho bëdamboen tantiata. ³⁶ Nuquin Papan bëdamboen iste tantiamequid tantiata. Adsho bëdambo icmequin Nuquin Papan cuidtiapimbo icquid mibi icmendac –quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquoio yaid

³⁷ Ëmbi dadpen chuiquin dada uabanacpadom-boembi Esusën comapenen tantiaquin dadpen nabansho isun con matses isadaidbon Esus tantiatiadquidi Esus tantienquo icpondash.

³⁸ Aden Esus tantienquo icte con tsusedpa Isayasën Nuquin Papan tantiamiacpadomboen chuiquin dada uapampic.

“Nuquin Papa yacnuësh choash nadec onquendac.

‘Mimbi chiaidquo chuibansho tantiashun: Muequien mibi nec, ëbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuësh choquidien nec, quetiadquidi adenquo iquendac, Papa, quependac,”

quequin Esusën chuite Isayasën dada uapampic.

³⁹ Nuquin Papan pamumëdabimboecnuc icmiac con matsesën Esus tantienquo icpondash. Aden chuiquin Isayasën padpiden dada uapampic.

⁴⁰ “Isadaidbon ëbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shëcuë nibëdabimboec icchitono.

Ëbi tantiasho abi icsaid bëpiscudquin bëdamboen ismane,”

quequin Nuquin Papan ambi con matses caido nëishëshun chushcaid Isayasën dada uapampic.

⁴¹ Nuquin Papambo Esusbëd uinsadpambo yec tabadsho isondaic icquin Isayasën aden Esus tantienquo icte chuipampic.

⁴² Con matses dadpenshun Esus tantienquo icnubi con matses chuiquidon abentsëcshun

abentsëcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuëdquin: —Esus tantiaquid nebi —quequin chuitiadquidi utsibo chienquio icpac caondash. ⁴³ —Ma con matsesëmbi ëbi bëdamboen isnu —quequinuidtsëqui tantiaquin aton matses chuitiapimbo icpac caondash. —Ma Nuquin Papan ëbi bëdamboen isnu. Aton Mado tantiaquid nebique —quetiadquidi adenquio yac caondash.

Cuidenquio icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidadacsho chuin-uec Esus padpidec comapenec onquepondash. —¿Ëbi tantianuequidën ëbiuidtsëquida tantiapadic? Padenquio. Ëbi tantiaquidën ëbi chomiondaidtsen tantiatsiash. ⁴⁵ Adembidi con Papadquiobidi ëbi icsho isun: “Ai, adquiobidien Nuquin Papa iquec,” quequin tantiatsiash. ⁴⁶ Nuquin Papan matses bëdamboen iste tantiamenuec matsesbëd tabadec chondabi. Adec matsesash: “Ëbi tantiaquido ma Nuquin Papan bëdamboen isquin bëdamboen tabadmenu,” quiash nebi. ⁴⁷ “Ëmbi aden chuisho tantiatiapimbo icquido nëbi cuidnu,” ¿quectabi icti? Padenquio. Nëbi Nuquin Papan bëdamboen isquin cuidenquio icte chuinuequini nec. ⁴⁸ Nuquin Papan cuidte ushëmbien ëbi tantiesabon: “Nuquin Papan chiaidshenda chuipadenec. Aid tantienquio yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹ ¿Ëmbembi chuiquindambi nadi? Padenquio. Ëbi

chomiondaid con Pan chiaidquo chiequini nec. ⁵⁰ “Èbi tantiaquid èbèdi tabadendac padpidec unësenquo yec,” queshun Nuquin Papan chiaiduidtsëqui chiequini nec –quepondash Esus.

13

Esusën abèd icquido tapanaid

¹⁻² Esusën comapenen tantiaquin nabanaid chuiquin aitedi chiombi. Nèbi abi tantiaquido tantiaquiec abided ciudadec unësaid chuiquin unësash abi uincuenaidtsen chuinu. Tantia. Nuquin Papan con tsusedpabo unës uainquo icquin matamiampid inchësh tantiaquin pec tabadte ushë nèbi yanuc inchëshën Esusbèd pec bédamboec tabadondabi. Padnuen Udas Simon Iscadioten mado Satanasën tantiamiacpadomboen Esus bedmete tantiec tsadpanèdash. Adnubien Esus: –Nèbi con Pa yacno nidebi nèido nianec. ³ Con Pabèd tabadec ambi tantiacpadec abèdi abitedishun Icbombo iccondaiddi nèbi anobiddi nidoash adquiobiddi icoaindabi. Adquid icquin nèido bédamboec tantianante ismenu –quequin tantiaquin ⁴ yuan nachimboen nadopondash. Uequin peboedi nidtotanec dashcute bèntse icquid dachiquidtanec daucudte tsibidiquepondash. ⁵ Tsibidiquetanquin pada-padaid dapan acte cushtotanquin abèd icquido tapambampondash. Daucudten tauchbanquin tapambanondash.

⁶ Aden tapambanquimbi: –Mibitsen tapanu –cac Petedon: –¿Icbonda yua tapampaid? Èbi tapanenda, Icbo. Padi –capondash. ⁷ Adoaquien

Esusën: —Ĕmbi nasho nēbi mimbi tantienquo iquec. Yuecshun mimbi tantiendac. En tapanu —caquien: ⁸ —Padi. Mibi bēdamboshē icquid nec. Ĕbien icsaquid nec. Yua namiacbimboen mibi tapametiapimbo iquebique. Padi —caoapondash Petedon. Adoquien: —Ĕmbi tapanabi yac con yuambo mibi ictiapimbo ictsiac —capondash Esusën. ⁹ Adsho tantiashun Petedon: —En na, Icho. Tapantanquimbi mapinobēdtabi ēbi mēpanta —caquien: ¹⁰ —Padi. Nesboed mibi nec. Taēnouidtsēqui bēchishacsho tapanembi. Ĕmbi bēchish ucac mibi bēdambo iquec. Abentsēc icsambo iquec —quepondash Esus. —Bēchish ucacimboen Ĕmbi nasho Nuquin Papan mibi bēdamboen isendac icsaid ucudacbimboecnuc —quequin tantiec: —Ĕmbi bēchish ucac mibi bēdambo iquec —quepondash Esus. ¹¹ —Udasēn ēbi unēs uamenuen bedmendac —quequin tantiec: —Abentsēc icsambo iquec —quepondash Esus.

¹² Aden tapambanash dasiuidash samēdquin pebededquin abēd icquido Esusën chuipondash. —Ĕmbi naboed ĵada tantie? Tantia. Mibi chuinu. ¹³ “Ĕbi chuiquidquo mibi nec,” mimbi ēbi capec. Adembidi: “Con Icho mibi nec,” mimbi ēbi capec. Bēdamboen mimbi chiec. Adquid nebique. ¹⁴ Ĕmbi nabocpadomboen mimbitsen nata. “Ĕbēd icquid tantiaquoquin tapanquin nashunu,” queshun naombique. Adecbidi nashunanta. Naden tantiashun nata. “Esus tantiaquido tantiaquiemi. Con buchibimboecnuc nashunu,” quiash nashunanta. ¹⁵ Ĕmbi nabocpadomboen namenuen adombique. Mimbitsen nata. ¹⁶ En chuinu. Tan-

tia. ¿Icbon chiacca chieshpadic? ¿“Nid,” cacta nidenquo icpadic? Icbon chiacpadomboen yuan naquid yendac. Adomboen tantiaquin ëmbi chiacpadomboen nata. ¹⁷ Ëmbi aden chuisho tantiashun ëmbi chiacpadomboen naic mibi bëdambo iquendac –quepondash Esus.

¹⁸ Adashic padpidec: –Mibitedi caic: “Bëdambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaïdo con yuabotedi tantiembi. Abentsëc icsambo iquec. “Aid con yuapenquo nec,” quequin ëmbi tantiaïdi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Ëbëdtan planeboedëmbi ëbi unës uamenuen bedmendac,” quequin dada uapampic. ¹⁹ “ ‘Abi unës uametebi chioishi. Nuquin Papapadquidquiobi icquimbien naosh,’ quequin ma tantianu,” qeshun mibi chiombi. ²⁰ Mibipadquidën nate mibi chuïnu. Tantia. Mibipadquidën ëbi chuïbansho tantiash: “Ai, abimbo caic,” qeshun utsibon ëbi tantiatsiash. Adembidi ëbi tantiashun ëbi chomiondaïd Nuquin Papatsen tantiatsiash –quepondash Esus.

Abi bedmequid Esusën chiaïd

(Mat 26.20-25; Mad 14.17-21; Duc 22.21-23)

²¹ Adshumbien abi bedmequid Udas tantiac unësquo icnuc Esusën chuïpondash. – Tantia. Mibitedi chuïnu. Ëbëd icquidëmbi ëbi chieshënquido ëbi bedmendac –quesho ²² tantiash abëd icquidobëd bëïsanec: –¿Tsutsi capec? Nëïdien cachitec –quecuededpondabi otacquo tantiec.

23 Ēbi tantiaquidquio yec con cachoctsëqui Esus uepondash. 24 Adec Esusën dayuntsëqui ueshobini: —“¿Tsutsi cai?” ca —capondash Petedon mēdquin onquenquio icquin. 25 Adoaquimbi cachoc isquin: —¿Tsutsi cai, Icbo? —capondac. 26 Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. 27 Adoac penubi Satanasquio Udas dapuduedquiopanēdash ambi tantiaidquio namenuc. Adshobien Esusën: —Mimbi tantiacpadomboen baded nēbimbobi naic nid, Udas —capondash.

28 Adsho tantiashini ëbitedi: —Tantiadenquio yec onquepec. ¿Atotsi quiash: “Baded naic nid,” quepec? —quepondac. 29 Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibēdquido piucquid menetan,” quepequien iccosh —quecuededpondash. 30 Pete cuëshēmpi pesho: —Nēbimbobi baded naic nid —caquien Udas nidpondash. Inchëshēmbi nidpondash Esus bedmenuen chiec nidec.

Tantiananquiota, quequin chiaid

31 Abi bedmenuen chiec Udas nidbombien Esus: —Nuquin Papan matsesmiaidquio icquin ambi tantiaidtedi nēbimbobimbi nainendac. Ēmbi nainsho isash con Pa bēdambo iquendac. 32 Ēbitsen bēdambo icmenuen con Pan comapenen tantiaquin ismendac. ¿Yuecshun quectabi icti? Nēbimbobimbi caindac —quepondash Esus. Abi unēs uatebēdta abi unēsash uincuenash Nuquin

Papa yacno nidte chiec adpondash. ³³ Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacadomboen mibi chuioanu. Tantia, mado. Ëbi nidacsho mimbi ëbi istuidenquo iquendac. Ëbi nidacno mibi nidtiapimbo iquendac. ³⁴ Aden tantiaquin Nuquin Papan chiaid utsi mibi chuinu. Ëbi nidan ëmbi chiacpadomboen nata. Ëmbi mibi tantiaquiacpadquiec tantiananquiota. ³⁵ Ëbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

*Petedo: Ëmbi isacmaid nec, quete chiaid
(Mat 26.31-35; Mad 14.27-31; Duc 22.31-34)*

³⁶ Adec —Nidebi —quesho tantiashun Petedon: —¿Mitsimbo nide, Icbo? —capondash. Adoaquien Esus: —Nëbi mibi nidtiapimbo yacno nidebi. Yucash ambo mibitsen nidendac —quepondash Esus. ³⁷ Adsho tantiash Petedo: —¿Atotsi queti-adquo yec: “Nëbi ëbëdi nidtiapimbo mibi iquiec,” quepo mibi? Mibëd nidec dacuëdenquo ictsiabi. Mibi chieshënquidon: “Unës uanu,” mibi casho tantiash: “Ëbien natiad,” quetsiandabi —quepondash Petedo.

³⁸ Adsho tantiashien Esus: —“Ëbien natiad,” ¿quecta icpatsia? Padenquo mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuëdcuededpondac.

14

Nuquin Papabëd tabadmendambi, quiaid

¹ Èbitedi dachuëdcuededsho isashien Esus: — Dachuëndenda. “Èbi dayun uaquid nec,” quequin mimbi Nuquin Papa tantiacpadomboen èbitsen tantiaquiota. ² Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Èbi tantiaquido èbëdi tabadmendambi,” quequin chiombi. ³ “Adquid iquec,” quiash èbia nidshun con Pa chiendambi. “Èbi tantiaquido neque. Nuquibëdi tabadmenuna,” quequin chiendambi. Adashic èbi yacno mibi buanuec choaindabi. ⁴ Èbi nidan èbi nidacno nidte mimbi tantiec — quepondash Esus.

⁵ Adsho tantiashun Tomasëntsen: — ¿Mitsimbo nide, Icho? Tantiambo iccombi. Podqued tantienquio iquembique. Èbi chui —caquien ⁶ Esus: —Nuquin Papa yacno nidte tantiamequidquio nebi. Nuquin Papan chiaiduidtsëqui chiec muesambo nebi. Adquid icquin èbi tantiaquid Nuquin Papabëd tabadmendambi. Èbi tantiesan Nuquin Papa tantiatiapimbo ictsiash. Èbi tantiaquidënuidtsëqui Nuquin Papa tantiatsiash. ⁷ Èbi caic: “Nuquin Papan Mado nec,” quequin mimbi Nuquin Papatsen tantiendac. Nèbi abipadquid èbi icsho isun Nuquin Papambo isacimboen mimbi tantiendac —quepondash Esus.

⁸ Adshobien Uedipentsen: —Nuquin Papa èbi isme, Icho. Nuquin Papa iste bunebique. Aid

isash bēdambo ictsiabi –caquien ⁹ aidtsen Esusēn: –¿Tantienquioda ique, Uedipe? Yuec mibēdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquiodidini nec. Ēbi adquid icsho isun: “‘Adquidquiodi Nuquin Papa iquec,’ quequin Nuquin Papatzen mīmbi tantiendac,” quequin mibi chiombi. ¿Atotsi quequimbini: “Nuquin Papa ěbi isme,” cai? ¹⁰ “Nuquin Papapadquidquiodi nebi,” ěbi qesho tantiash: “Ai, abimbo caic,” ¿quenquioda icco? Ēmbembi chienquioda iccombi. Con Pan chaidquioda chiequini nec. Adembidi ěmbembi nabanenquioda iccombi. Ēbēd tēshnanenquioda icquin con Pan namiaquimbi naoc. Ēmbembi nainquioda iccombi. ¹¹ “Con Papadquidquiodi nebi,” ěbi qesho tantiashun: “Ai, abimbo caic,” cata. Ēmbi chaid tantiatiapimbo icquin ěmbi comapenen tantiaquin dadpen nabamboedquioda tantiata. Aden ěmbi nabamboed tantiaquin: “Nuquin Papan chomiaidēnuidtsēquien adotsiash,” quequin tantiata. ¹² Tantiata. Mibi chuinu. Ēmbi nacpadomboen ěbi tantiaquiodontsen comapenen tantiaquin nabanendac. Ēmbi chuibanac daēdpactsēcshun ěbi tantiabentsēccosh. Con Pa yacno nidshun ěmbi chomiaidēn con Mayanēn namiac mibipadquidēn ěbi chuibanac dadpenshun ěbi tantiabenendac. ¹³ Ēmbi chiacpadomboen naquidēn: “Ēbi nashunta, Icho,” qesho tantiashun ambi chiacpadomboen nashunendambi. “Nuquin Papa bēdamboshē iquec,” camenuen ¹⁴ ěbi tantiaquidēn chiacpadomboen nashunendambi –quepondash Esus abēd icquioda chiec.

Nuquin Papan Mayan tabadte chiaid

15 Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquio iquendac. 16 Adotiadquio icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. 17 Adoac mibi nianenquio yec mibëdi tëshnanenquio iquendac. Mibëd icquin ëbi chuiquin mibi abimbo tantiamendac. Aid isadenquio icsho ëbi tantiesabon aid tantiatipimbo iquec. Mimbien aid tantiec. Con Pan ëbëdicmiaidquio nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibëdi tëshnanenquio yec tabadendac con Mayan. 18 ¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibëd aid icnuc ëbëd yacimboequi con Mayan tantiadendac. 19 Nëbi ëbi nidacsho ëbi tantiesabon ëbi isenquio icnuc mimbi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. 20 Ëbi uincuenaid ushëmbi mimbi naden tantiendac. “Esusën Nuquin Papa tantiaquieci aibëd tëshnanenquio icquin aidën chiacpadomboenuidi naindac. Adecbidi Esusbëd tantiananquieci aibëd tëshnanenquio icquin aidën chiacpadomboen natiadquio yec tabadebi,” quequin mimbi tantiendac. 21 Ëmbi chiacpadomboen naquid ëbi tantiaquidquio

nec. Ëbi tantiaquidquo mibi icscho con Pabëdtan mibi tantiaquioquin: “Adquo aton Papabëd Esus iquec,” camequin mibi bëdamboen tantiamendambi –quepondash Esus.

²² Adsho tantiashun Udas utsin abi bedmequidënpenuo: –“Nuquin Papa yacnuësh choash con matses chuiquidquo yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantieme, Icbo? –caquien

²³ Esus padpidec: –Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aïdbëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiadendac. ²⁴ Ëbi tantienquo icquidoen ëmbi chiaid niac-niacquido nendac. ¿Ëmbiuidtsëqui chiaïdta adquidën niac-niacpadiç? Mambi Nuquin Papan chiaïdquo chuïboc. Aïdën chiaïdquo adquidën niac-niaquec –quepondash Esus abëd icquido chieç.

²⁵ Adashic padpidec Esus onquiondash. –Mibi bëdiactsëc tantiemequin mibëd icquin con Pan chiaïd chuïbanombi. ²⁶ Con Pa yacno nidshun ëmbi: “Nuquin Mayan aïdobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naïdbëdta ëmbi chiondaïdtedimbo mibi bëdamboen tantiamendac. ²⁷ Con Pa yacno nidshun con Mayan mibëdi tabadmequin dacuëdenquo icquid mibi icmendambi. Adoac dacuëdenquo yec bëdamboec

tabadta. Ĕbi tantiesabo dacuēdacimboec dacuēdenda. Comapenec dacuēdtanec uinte paēdtanec aido tabadnubi mibi dacuēdenquoio yec bēdamboec tabadta. ²⁸ “Nēbimbobini con Pa yacno nidendac. Adtanequic choaindabi,” quepobi mibi chiec. Ĕbi adsho tantiash Ĕbi tantiaquidombo cuishonquetsiash. “Esus abi namequid aton Papabēd tabadec nidec,” quiash Ĕbi tantiec cuishonquetsiash. ²⁹ Nidnumbi mibi chiec nebi. “Unēsash uincuenendabi. Adashic con Pa yacno nidendabi,” quiobi. “Ĕmbi chiacpadec Ĕbi adsho isun ma nēidon; ‘Esusēn abimboshenda capondash. Ambi chiondacpadquid Nuquin Papan Madombo nec,’ quequin tantianu,” quiash adobi. ³⁰ Nēbi Ĕnquimbi chuinu. Ĕbi tantiesabon icbo Satanas Ĕbi unēs uamenuec choec. Ambembi aidēn Ĕbi unēs uametiapimbo iquec. ³¹ Con Pan tantiacpadequinini unēsendac. Ĕbi adec unēsō isash: “‘Nuquin Papa tantiaquin ambi chiacpadomboen naic abided cuidadec Esus unēsac,’ quequin ma matses abitedishun tantianu,” quiash adebi. Nēbimbobimbi naique. Nidec nidnu. Nid — quepondash Esus.

15

Shancuinbiecquid uba caid chiaid

¹ —Nidec nidnu. Nid —quetanquimbi padpiden chuipondashi ompoacimboen chuiquin. — ĔMitsipadquoio shancuinbiecquid uba caid icpec? Mapictsēc ictsequi cuidi-cuidipambo yanquid. Adquidic shancuin bacuēbimboec didiquequid. Uba dadan aton cuidi canimequin bēdambo icmequid. Adomboembidi Ĕbi tantiaquido

bëdambo icmendambi. Nuquin Papain uba icbobimboecquid nec. ² Uba aton icbon cuidi utsiuc bacuëesa icsho pateshunepaid yoc. Adoachimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bëdamboen bacuëmenuen dadpen cuidi icquid cuidi dadpen pateshun siaquid. Adomboembidi ëbi tantiaquido bëdamboshë icmenuen Nuquin Papan aidon icsamboen naid ëmetsiash. ³ Ëmbi chiacpadomboen naic mibi bëdambo iquec. Aden ëbi tantiasho Nuquin Papan mibi bëdamboen isec. ⁴ Ëbi adembidi tantiaquin ëmbi chiacpadomboen nata. Adsho isash mibi bëdamboen tabadmec mibëd iquendabi. Uba cuidi padquëdaid bacuëtiapimbo iquendac. ⁵ Adecbidi ëbëdi tëshnanash matses bëdambo ictiapimbo iqueque. Ëbëd tëshnanenquio yec bëdamboec tabadta. Bëdamboec tabadquin mimbi utsibo ëbi tantiametsiac. ⁶ Uba icbon cuidi utsiuc bacuëesa icsho pateshun tsindoshon nëdëncapaid yoc. Adoachimboen ëbi tantiesabo unësacsho Nuquin Papan ambi icsaido cuidacno nësecaindac —quepondash Esus.

⁷ Adshumbic Esusën padpiden chuipondash. —Ëbi tantiaquin ëmbi chiacpadomboen naquidën: “Ëbi nashunta, Papa,” cac ambi chiacpadomboen Nuquin Papan nashuntsiash. ⁸ Nuquin Papan adoshonac: “Nuquin Papa bëdambo iquec,” mimbi catsiac. Adembidi utsibotsen: “Nuquin Papa bëdambo iquec,” camenuen bëdamboec tabadquin ëbi tantiameta. Mimbi adosho:

“Ai, ëbi tantiaquidquo nec,” caindambi.
 9 Con Pan ëbi tantiaquiacpadomboembi
 mibi tantiaquiembi. Adoaid icquin ëbitsen
 tantiaquioquin ëmbi chiacpadomboen nata.
 10 Abi tantiaquioquin ambi chiacpadomboen
 nashobini con Pan tantiaquiec. Adembidi
 ëbi tantiaquidën ëmbi chiacpadomboen nasho
 ëmbitsen aid tantiaquiendambi. 11 “Ëbi
 cuishonquiacpadquiecbidi ma ëbi tantiaquiec
 cuishonquequiono,” queshun aden mibi chiembi
 —quepondash Esus abëd icquido chiec.

Tantiananta, quequin Esusën chiaid

12 Adashic abëd icquido padpiden chiec Esus:
 —Ëmbi mibi tantiaquiacpadquiec tantiananta.
 13 Nadquiec caimbi. “Min utsi cuesnu,” cashunac:
 “Ëbien natiad,” quiacbimboec tantiananta. Aden
 mibi tantiec ëbided cuidadec unësendabi. 14 Ëmbi
 chiacpadomboen nasho mibi con utsi caimbi.
 15 Ëmbi con yua caboedobi mibi con utsi caimbi.
 Icbon: “Tantia. Chuinu. Nadono. ¿Ada bëda
 icpec?” quequin aton yua chienquo icquin
 aton utsien aden chuipaid. Con Pan: “Ma abi
 tantiaquido chuinu,” caidtedi mibi chiombique.
 Mibi con utsi caimbi. 16 “Esusbëd iquec nidnu,”
 ¿quequina mimbembi tantiadionda? Ëmbien
 mibi: “Nuquibi icnu. Cho,” caondac. “Utsibo
 tantiamequin ma nëidon ëbi chuibenenu.
 Adoac utsibotsen ëbëd tabadtequid yanendac,”
 queshun mibi cho caondambi. Aden ëmbi
 chiacpadomboen naquidën Nuquin Papa
 chuiquin: “Min Mado Ësus tantiaquid ëbi icsho
 ëmbi chiacpadomboen ëbi nashunta, Papa,”

mimbi cac mimbi chiacpadomboen Nuquin Papan mibi nashuntsiash. ¹⁷ Ëbi adsho tantiash ëmbi chiacpadquiec tantiananta –quepondash Esus.

Esus tantiaquido chieshënte chiaid

¹⁸ Adashic padpidec Esus onquepondash. — Ëbi tantienquo icquidon chieshënac: “Aden Esusba chieshënondash,” quequin tantiata. ¹⁹ Ëbi tantiesabo icsho ëbi chieshënquidon mibi bëdamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. ²⁰ “Yuan icbon chiacpadomboen napaid yoc,” quequin ëmbi ¿chuiboedta tantie? Aden ëmbi chiacpadomboen nasho ëbi chieshënquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen ëmbi chiaid tantiaquidën mimbi chiaidtsen tantiendac. ²¹ Ëbi chieshënquidombi ëbi chomiondaidquo tantiaquin ëbi chieshënenquo ictsiash. Ma ëbi chomiondaid Nuquin Papa tantienquo icquin aidon ëbi chieshëmpayoc. Adomboembidi ëbi tantiaquidotsen chieshënoaindac. ²²⁻²³ ¿Ëbi chieshënquidon ëbiuidtsëquida chieshëmpadic? Ma ëbi chieshënquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënquido ëbi chieshë nec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan ëbi chieshënquido: “Mibi icsamboshë

iquec,” caindac. ²⁴ Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshënec mibi icsambo iquec,” cainquio ictsenosh. Utsibon nabanacmaidquio comapenen tantiaquin mambi nabamboc. Adosho isash ëbi chieshënquido: “Icsapenquio iquebi,” quetiapimbo iquendac. Ëmbi nabansho isun ëbi chieshënquin con Patsen chieshënec. ²⁵ “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec –quepondash Esus.

²⁶ Adashic padpidec: –Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. ²⁷ Adoac mimbitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëndenda.

16

¹ “Chieshtonoshe,” qeshun mibi aden chiombi. Mibitsen chieshënac dacuëndenda. Mibëd con Mayan tabadmembique. ² Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quepen-

dac. ³ Aden Nuquin Papa ëbëdta tantienquoio icquidon ëbi tantiaquidotsen chieshënendac. ⁴ Mibi chieshënac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” queshun nëbi mibi chiemi. “Ëbi icnuc ëbi tantiaquido cuesun secadenquoio iquec. Ëbi nidambien aido cuesun secabenendac,” quequin tantiaquin ënden aden mibi chienquoio iccondambi. “Nëbi nidebi,” queshun nëbi mibi chiemi –quepondash Esus.

Nuquin Papan Mayan chote chiaid

⁵ Adashic: –Nëbi ëbi chomiondaidbëd tabadec nidendabi –quepondash Esus. Adsho tantiaash padequimbo tabadpondabi. Adec ëbi padequimbo tabadsho isash Esus padpidec onquepondash. –“¿Mitsimbo nide?” ¿quenquioda ique? ⁶ Ai, ëmbi chuiboed tantiac unësquoio icnuen mibi ëbi chienquoio icchitec. ⁷ Ëbi nibëdnuc mibi bëdambo iquendac. Ëbi nidenquoio icnuc con Mayan mibi bëdamboen tantiamenuec choenquoio ictsiash. Nidshumbimbi mibëdi tabadmenuen chomendac. ⁸ Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. ⁹ Aden Nuquin Papan Mayanën tantiamiac: “Esus tantienquoio yec icsambo icchitebi,” quendac matses. ¹⁰ Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiaashoeni Nuquin Papan bëdamboen istsiash,” quendac matses. Ëbi isadenquoio yec con Pa yacno nidan con Mayanën tantiamiac

matses adendac. ¹¹ Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquo icquidobēdta Nuquin Papan cuidendac,” quendac matses. Con Mayanën tantiamiac adec matses onquendac –quepondash Esus.

¹² Adashic abēd icquido chiec Esus: –Mibi dadpenquo chuitiadquo icquimbi nēbi dadpen chienquo iquembi. Nēbi ěmbi chuisho mimbi tantiatipimbo iquēc. ¹³ Nuquin Papan Mayan choshombien mibi abimbo chuiquin ěbi tantiamendac. Ambembi chienquo icquin Nuquin Papan chiaiduidi chiendac. “Nadquo iquendac. Adecbidi nadquid choendac,” quequin mibi dadpen tantiamendac. ¹⁴ Adembidi ěmbi naidbēdta ěmbi chiaidtedi tantiamequin: “Esus bēdamboshē iquēc,” camendac. ¹⁵ ¿Ĕbiuidtsēqui tantiamenuenda con Mayanën adopec? Padenquo. Ĕmbembi chiaid mambi chiambo yoc. Nuquin Papan chiacpadomboenuidi naquin ambi chiaiduidtsēquimbi chuibandenioc. “Con Mayanën ěbēdta con Pa tantiamendac,” quequin tantiec: “Ĕmbi naidbēdta ěmbi chiaidtedi tantiamendac,” quiobi –quepondash Esus abēd icquido chiec.

Abi nidte Esusën chiaid

¹⁶ Adashic padpidec: –Nēbi isadenquo yanebi. Adashic yuecpectsēc yash isadcuenendabi –quepondash Esus. –Nēbi unēsash uincuenash padpidec isadebi –quequin tantiec adondash. ¹⁷ Adsho tantiashini ěbitedi: –¿Atotsi quepec? Tantiadenquo yec onquepec. “Con Pa yacno nidash ěbi nibēdnuc mibi tabadendac,”

ma quepaboc. ¿Atotsi chuitiadquoio yec: “Nëbi isadenquoio ictanec yuecpactsëc yash isadcuenendabi,” queposh? ¹⁸ ¿Atotsi quepec nec? –quepondabi Esusbëd icquidobëd onquec. Esus tantiamenquoio yec sho-shoshquetsëcquiec onquepondabi. ¹⁹ Adsho ambembi tantiaash: –Ëbëd icquidon ëbi chuitiadquoio iquec –queshun Esusën: –“¿Atotsi chuitiadquoio yec nio?” quequin ëbi chuite mibi buneque. ²⁰ Tantia. Mibi Chuinu. Ëbi unëso isash mibi sedenquenubi ëbi tantienquoio icquido cuishonquendac. Adec sedenqueboedobi mibitsen cuishonquianendac. ²¹ ¿Mitsipadquoio bacuë tishec chido icpec? Bacuë cuididiquenuc natiamboshë icboedi bacuë tishash cuishonquepaid yoc. ²² Adecbidi nëbimbobi ëbi unëso isash mibi natiaquiendac. Adboedi yuecpactsëcshun ëbi padpiden isash mibi cuishonquendac ënëdenquoio yec. ²³ Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. ²⁴ Aden mimbi Nuquin Papa chianenquoio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac –quepondash Esus abëd icquido chiec.

Esusën aböd icquido ënquimbi chiaid

²⁵ Adashic aböd icquido padpiden chiec: —Ompoachimboen dadpen chuibaniami. Yuecpactsëcshun: “Con Pa nadquio iquec,” quequin mibi sebadënquio chiendambi — quepondash Esus. —Uincuenshun aden chiendambi —quequin tantiec adondash Esus.

²⁶ Adashic padpidec: —Con Pa yacno ëbi nidan mibi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquio. ²⁷ Mibitsen tantiaquin Nuquin Papan mibi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquiquin mibi nashunendac. ²⁸ Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

²⁹ Adsho tantiashini ëbitedi: —Adquidshenda mibi nepec. Ma nëbi mibi sebadënquio chieyoc.

³⁰ Mibi: “Nëbi isadenquio yanebi,” quioc. Adashic: “Yuecpactsëc yash isadcuenendabi,” mibi qesho tantiash mibi tantiamenquio yec sho-shoshquetsëcquiec: “¿Atotsi quepec?” quecuededpobi. Mibi chuimetiadquio iccobi. Ëmbi chiambobi ma mimbibi tantiapaboc. Comapenen tantiaquidquio icquin ma mibi abitedimbo tantiapayoc. Aden tantiaquid yec Nuquin Papa yacnuësh choquid mibi nec — quepondabi ëbitedi. ³¹ Adsho tantiash Esus:

—Ai, nëbi mimbi ëbi tantiaquiec. ³² Aden ëbi tantiaquidquiobi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquio iquendac. ³³ “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

17

Esusën Nuquin Papa chiaid

¹ —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. ² Ëndenquimboshë mimbi ëbi chiondac naden chuiquin. “Nuqui matses uaidon abitedishun Icho mibi nec, Mado,” quequin mimbi ëbi chiondac. Mimbi adondaïd icquin mimbi tantiactedi matses nuquibëd tabadtequido icmendambi, Papa. ³ Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaïdquio Esus nec,” quequin tantiasho nuquibëd tabadtequido icmendambi, Papa. ⁴ Mimbi chiacpadomboen

naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdamboshë iquec,” quependac, Papa. ⁵ Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa –quepondash Esus Nuquin Papa chiec.

Esusën abëd icquido Nuquin Papa chiaid

⁶ Adshumbic Esusën abëd icquido ëbitedi chuiquin aton Papa chuioapondash. –Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquio chiac: “Ai, adotiadquio iquebi,” quiosh, Papa. ⁷ Adembidi aidon: “Nuquin Papan namiaidquio nec. Ambembi nainquio iquec,” quequin ëbi tantiaposh. ⁸ Mimbi chiaid ëmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi ëbëd icquidon, Papa. ⁹ Ëbi tantienquio icquido mibi chienquio iquembi, Papa. Ëbi tantiaquidouditsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon. ¹⁰ Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icbo mibi canu. Mimbi chiacpadec bëdamboec tabadtiadquio iquebi,” quequin bëdambo icmioshi, Papa. ¹¹ Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënquidon chieshtomenushe.

Nëido bēdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nēido bēdamboen dayun uata, Papa. ¹² Aidobēd icquin mimbi chiaidquio bēdamboen chuibanquin chieshtomiambo iccombi. Aden bēdamboen dayun uaqun ëbi tantiaquido cudasēnquin Satanas yuamiambo iccombi. Udas abentsēquien Satanasēn yuatsaccosh. Mimbi chiaid matsesēn dada uapampicpadomboen ëbi bedmuenen Satanasēn Udas yuaccosh. Adoac ëbi bedmequid yanash mimbi cuidtequid iquendac.

¹³ Nēbi mibi yacno nidendabi, Papa. “Ëbi nidan dacuēdec ëbi tantiaquido chieshtonoshe,” queshun mibi otacquio chienquio iquembi. “Ëmbi abi dayun uate chuisho tantiaash ëbi yacpadec ma cuishonquenu,” quequin mibi otacquio chienquio iquembi, Papa. ¹⁴ Mimbi chiaidquio nēido chuibanombi. Adoac ëbi tantiaquido yansho ëbi chieshēnquidon nēidotsen chieshēmpec. Ëbi yacpadec mimbi chiaid niac-niacte bunenquio icshobidi nēido chieshēnquiec, Papa. ¹⁵ Aden tantiaash: “Ëbi tantienquio icquidobēdi ëbi tantiaquido tabadmenda,” ¿quectabi ique? Padenquio. “Ëbi tantiaquido chieshtomenda,” caimbi, Papa. Satanasēn yuanushe. Bēdamboen dayun uaqun chieshtomenda, Papa. ¹⁶ Ëbi tantiesabo tabadacpadec tabadenquio icquin ëmbi nabocpadomboen natiadquio iqueque. ¹⁷ Mimbi chiaidquio pausunquioquin bēdamboen tabadme, Papa. ¹⁸ Mimbi ëbi: “Matses

chiec nid,” caondacpadomboen aido: “Ëbi chuibeneta,” caindami. Adoac nëidon ëbi chuibenendac, Papa. ¹⁹ Nëido tantiaquiec nëbimbobini mimbi chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiaish ëbi tantiaquido min yuabombo icmenuec adebi, Papa —quepondash Esus aton Papa chiec.

Esusën abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa. ²¹ Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiacpadec ëbi tantiaquidotedi shubu abentsëquën tabadacbimboecnuc tantianameta, Papa. Adsho isash nuqui tantienquio icquido nadtsiash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash. ²² “Mibëd ëbi tantiananquiacpadquiec ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa. ²³ Nuqui tëshnanenquio yacpadec aidobëd tëshnanenquio iquendabi. “Chieshënanenquio yec tantiananquiec ma bëdamboec tabadnu,” quec aidobëd tëshnanenquio iquendabi, Papa.

Adec ëbi tantiaquido bédamboec tantianansho isun matsesën naden tantiatsiash. “Ambi chiacpadquid Nuquin Papan chomenëdaid icquin Esusën abi tantiaquido aden bédamboen tabadmec. Ambi chomenëdaid aton Mado tantiaquiapadomboen Nuquin Papan aid tantiaquido tantiaquiec,” quequin matsesën tantiatsiash, Papa. ²⁴ Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ëmbi tantiaidquio mibi neque. Nuquibi nanuna, Mado,’ cac nuqui bédamboshë yec tabadtenecpadequi nuqui tabadsho ma ëbi tantiaquidon isnu,” queshun mibi: “Nuqui yacno tabadmeta, Papa,” caimbi. ²⁵ Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. ²⁶ Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiapadomboen ma nuqui daëdi tantiaquiash ma tantiananquiono,” queshun con Mayan aidobëd tabadmendambi. Adoac ëbëd icacimboec con Mayan tantiadendac, Papa — quepondash Esus Nuquin Papa chiec.

18

Esus bedmiaid
(Mat 26.47-56; Mad 14.43-50; Duc 22.47-53)

1 Aden Nuquin Papa yuen chianec Esus nidpondash. Ĕbi chedobĕd nidquin acte Sededon caid potiash tiedno cuĕte odibos caid nitsinacno ĕbitedi chiec tabadtenebocnombo chopondash. ² Ambo tabadnubien Udas: — Ĕbi abĕd tabadtenebocno tiednoen nidchitash —quianec Esus bedmenuec ³ chopondash. Aden chieshĕmĕnquido chuiquid dapabo chuitanshun matses dadpen bĕpondash nĕidtedi. Nĕidic con matses chuiquid dapabobĕdtan padiseyobon namiaido sondado chedo. Nĕidic con matses yuaquido Doma yacnocquido sondado dadpen. Nĕidic aid sondado chuiquid. Aidedi Udasĕn bĕpondash. Tabotebĕdta cuate sanambededtsĕcquiec cho-chopondash. Utsibombic chĕshte.

⁴ Adec cho-chosho isash bĕquedbanec nidquin: —Ĕbi unĕs uamec —quequin tantiaquin Esusĕn: —ĵAtotsi quec ne? ĵTsutsi nibĕne? —cac ⁵ — Nasaded yacnuĕsh caniquid Esus bednuec nebi —quepondash sondado chuiquid. Adshun isac aidbĕd Esus bedmequid Udas icpondash.

⁶ Adshobien Esusĕn: —Nĕ iquebi — capondash. Nuquin Papapadquidquiobi icquin adoac dacuĕdec: —Auchidi cuenu — quec uebudcuededpondash bednuequidotedi.

⁷ Adshobien padpiden Esusĕn: —ĵTsutsi nibĕne? — cac: —Nasaded yacnuĕsh caniquid Esus bednuec nebi —queoasho tantiaquin: ⁸ —“Nĕ iquebi,” caombi. Ĕbiuidtsĕqui bedta. Ĕbĕd icquido bedenda —capondash Esusĕn. ⁹ —“Mimbi ĕbi tantiaquid icmiaido Satanas chieshtomiambo iccombi, Papa,” quequin ĕmbi Nuquin Papa

chuibocpadomboen nëido chieshtometiapimbo iquebi –quequin tantiec: –Nëid bedenda – quepondash Esus.

¹⁰ Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash.

¹¹ Adosho isashien Esus: –Padi. Chën. Min chështe naued. Nuquin Papan chiacpadec paëmbo icnuc unësendabi –quepondash Esus.

*Anasën shubuno Esus buanaid
(Mat 26.57-58; Mad 14.53-54; Duc 22.54)*

¹² Adshobien sondado chedon Esus bedpondash. Aden bedshun: –Cuidmenun chuiquid dapa yacno mibi buanu –catanquin catanepondash. ¹³⁻¹⁴ Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshë nec: –Nuquin matsestedi unës uamenquio icnuen Esused unës uamenuna –queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquio Caipas ismenuen buampondash.

*Petedon: Ëmbi isacmaid Esus nec, quequin chiaid
(Mat 26.69-70; Mad 14.66-68; Duc 22.55-57)*

¹⁵ Esus buansho isun Petedobëdtan chinunondambi. Chinuntuidash nidequi Caipasën shubuno choash daquënë uaidën puduednuesho tantiasun shëcuë isquid chidon puduedmiondashi. Ambi isondaic icsho aden puduedmiondashi. ¹⁶ Ëbi puduedmequin Petedo ambi isacmaid icsho puduedmenquio

icpondash. Adsho istanquin: —Ëbéd icquid neque. Shëcneshun. Ma puduednu —capondambi. ¹⁷ Adoac puduedmeshun shëcuë isquid chidon: —¿Në bedboed Esusbéd icquidta mibi ne? —capondash Petedo chuiquin. Adoaquien Petedo dacuëdec: —Padenquio —quepondash muequi. ¹⁸ Adnubien iquendoshon daquënë uacnoshon cuëte dëtsiadoshon sondado chedobéd anocquido yuabo cuëte cuëec tabadpondash. Adsho isashien Petedotsen cuëte cuënuéc nidpondash ëbi shubunquio puduednuc.

Caipasën Esus chuimiai

(Mat 26.59-66; Mad 14.55-64; Duc 22.66-71)

¹⁹ Adec ëbi puduednubien Caipasën Esus chuimepondash. —Mibéd icquid ¿tedtsi iquec? ¿Ëbéd icquido dëniaquecta icpec? Mibéd icquido ¿mitsipaden chuibano? —capondash. ²⁰ Adoaquien Esusën chuipondash. —¿Ompoquindambi chuibandio? Nuquin Papa tabadte shubu uashunaid daquënë uaidën puduedshun mambi chuibandeneboc. Nuquin Papan chiaid chuibante shubun-shubunquiec puduedcuenequin mambi chuibeneboc. Ompoquin chiambo iccombi. ²¹ Mimbi: “Icsamboen naosh,” caid ëbiuidtsëqui chuimenda. Ëbéd icboedotsen chuime. Ëmbi chiaid abitedi tantiashun aidombi mibi chuitsiashe. Aidotsen chuime —quepondash Esus.

²² Adsho tantiashun: —¿Chuiquid dapada adopaid? —quetanquin sondado chuiquidën mëdanten bëcuespondash Esus. ²³ Adoaquien: —¿Icsamboendambi chuidio? ¿Atotsimbi icsa uaoque? En chui. Mambi abimbo chuiboc. ¿Abimbo

chuiquidta cuesday? –quepondash Esus.
²⁴ Adondash Esus Anasën abi cataniacchobi
 Caipasën shubuno bëac.

*Petedon: Ęmbi isacmaid Esus nec, quequin
 chuioaid*

(Mat 26.71-75; Mad 14.69-72; Duc 22.58-62)

²⁵ Adnubien Petedo abi cuëte cuëec tsadsho
 abëdtan cuëte cuëec tabadquidon: –Esusbëd
 icquidien mibi nechitec –capondash. Adoaquien
 Petedo: –Padenquio. Mabi aibdëd icambo yoc
 –quepac caondash. ²⁶ Adshobien chuiquid dapan
 yua utsin Petedon pateshuneboedën matsesën:
 –Esus bedacnobimbi mibi ischitoc –caquien
²⁷ padpidec: –Padenquio. Mabi ano nidambo yoc.
 Ęmbi isacmaidquio ma Esus neyoc –quenubien
 Esusën chuibodquio cachina bënë cuëdampac
 caondash.

Pidato caidën shubuno Esus buanaid

(Mat 27.1-2; Mad 15.1-5; Duc 23.1-5)

²⁸ Adnubien Caipas aton chuiquid utsibobëd:
 –Nuquin matses yuaquido ancaquid Pidato caid
 ismenuembien Esus buantiad. Aid Esus unës
 uamenuembien natiad –quecuededpondash.
 Badiadnubi Pidaton shubuno Esus buam-
 pondash. Buanashic: –Matses utsin shubun
 puduedshun mishtemaid mishash Nuquin Papan
 matamiampid inchësh tantiec con matsesbëd
 pec tabadtiapimbo icchitomane –quiash Pidaton
 shubun puduedenquio icpondash. ²⁹ Adnubien
 Pidaton aton shubunuësh pduentanquin Esus
 bëquido chuipondash. –¿Atotsi quequin nëid
 bëo? ¿Icsamboen naquidta nepec? –caquien ³⁰ –
 ¿Bëdambo icquidtambi mibi ismenuen bëdio?

Con matses chuiquid dapa ictiadquio icquin icsamboen naoshe. Cuidquiota —quepondash chieshëmënquido. ³¹ Adoaquien Pidaton: — Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuidsëqui unës uaquin cuidaquien bëdambo ictsiash,” queshun ëbitedi chieshënushe —quepondash Esus chieshënquido Pidatombo Esus unës uametiadquio yec. ³² Ënden abi chieshënquidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuc adpondash.

³³ Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien ³⁴ Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. ³⁵ Adoaquien Pidaton: —¿Isadaidbodabi nedi? Padenquio. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien ³⁶ Esusën Pidaton bëyuc chui-boed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

³⁷ Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid

nebi. Chuiquid dapambo icnuec matsespond-
abi. Chuiquid icquin matses uaquid tantia-
menuen abimbo chuibanombi. Adoac abimbo
chuisho tantiate bunquidon ëbi tantiatsiandac –
quepondash Esus.

³⁸ Adsho tantiash Pidato: –¿Tsuntsin matses
uaquid quequin abimbo chuipatsiash? –
quetanec puduenshun Esus chieshënquido
chuiopondash. –¿Icsambo icquidta Esus
nedic? Ma icsapenquio icquid neyoc. ³⁹ Nëid
cuidtiapimbo icquin chuinu. Nuquin Papan
matamiampid inchësh tantiate ushën min matses
quënën nauedaid abentsëc cuemedeniøndambi.
Adembidi abentsëc cuemembi. ¿Mitsicquidimbi
cueme? ¿Nëid mibi chuiquid dapa Esustambi
cuemepe? –caquien: ⁴⁰ –Padenquio. Esus
nainda. Utsibi cuemeta. Badabas caid
cuemeta –quecuededpondash. Badabas caid
Doma yacnocquido cuesun siaquin cuemete
bunquidquio icnuc adcuededpondash Esus
chieshënquido Esus unës uamete bunquiec.

19

Esus cueshcaid

(Mat 27.27-31; Mad 15.16-20)

¹ –Badabasquio cuemeta –quesho
tantiatanquin Pidaton: –Në Esus cueshcanuen
buan –capondash. Adoaquien buanshun
sondadon canite cuëshë dëdectanquin nacnenaïd
cueshcanten Esus comapenen cueshcapac
caondash. ² Cueshcatanquin pinchuc-
pinchucpambo icquid mauete nacnenaïd
Esus mauemepac caondash. Adotanquimbic

chuiquid dapan dashcutebimboecquid umucquid dasiuintanquin: ³ —Adec dasiuidquid chuiquid dapambo nec —quequin sondadon Esus mamënshumpac caondash. Aden mamënshunquimbi: —Isadaidbo matses chuiquid dapambo Esus neque. Is —quetanquin mēdanten bēcuesbanepac caondash. Adotanquin Pidato yacnobidi buanoapac caondash.

Esus unēs ua, quiaid

(Mat 27.15-26; Mad 15.6-15; Duc 23.13-25)

⁴ Buanoacsho istanequien Pidato padpidec puduenoash Esus bēquido chiec: —Mimbi bēboed Esus icsapenquio iquec. Icsambo icquid icsho: “Unēs uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien ⁵ Esus puduempondash. Pinchuc-pinchucpambo icquid mauemetanquin dashcute umucquid dasiūinac dasiuidpamboec puduenshobien Pidaton: —Is. Mimbi bēboed choeque —cac ⁶ chosho istanequien: —Cuesten dectanquin unēs uata. Cuesten dectanquin unēs uata —quecuededpondash Esus chieshēnquido comapenec cuēdec. Adoaquien Pidaton: —Mimbi cuesten dectanquin unēs uatan. Ęmbimbo adotiapimbo iquebi. Icsapenquio icquid icsho Esus unēs uatiapimbo iquebi —capondash Pidaton.

⁷ Adoaquien Esus chieshēnquidon: —Con mat-sesën: “Nuquin Papa muauaquid unēs uaquid

yendac,” cacpadomboen natiadquio iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad –quepondash. ⁸ –“Nuquin Papan Madombo nebi,” quiosh –quesho tantiashien Pidato dacuëdquiec yampac caondash. ⁹ Adash aton shubun Esusbëdi puduedoashun Pidaton Esus chuioapondash. –¿Tsutsimbo ne? ¿Mitsiuëshquio chonda? –caqui Esusën ëcbedenquio icpondash.

¹⁰ Aden ëcbedenquio yac nëishashien Pidato: –¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiash. Ëmbi: “Cuesten dectanquin unës ua,” cac mibi adotsiashe. En chui –caquien Esus: ¹¹ –¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi ëbi cuesten dectanquin unës uametiapimbo ictsiac. Ëbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec –quepondash Esus.

¹² Adsho tantiashien Pidato: –Esus unës uatiapimbo icchitebi. Cuemetiadquio iquebi –quetanquin padpiden Esus chïeshënquido chuitanoapondash. –Esus cuemenu –caquien: –Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaquec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua

—quecuededpondash. ¹³ Adsho tantiashun Esus puduemeoatanec cuënote nacnenaïd abuc tsadunaidën cuidte chuïnuec tsadten tsadtopondash Pidato. Aid cuënote nacnenaïd con onqueten Cabata capondash. ¹⁴ Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵ Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caïd aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoaquien Esus chieshënquidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

Cuesten dectanquin Esus unës uaid

(Mat 27.32-56; Mad 15.21-41; Duc 23.26-49)

¹⁷ Adoac buanquin: —Nëidën dectanu —qeshun sondadon cuate daëd napotiaïd Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caïd yacno buampondash. Aid macuësh mapi canite cain con onqueten Cocata capondash. ¹⁸ Ambo nidshun aton dashcute dachictanquin bëchun shuin mëtoccaquinc tatoccaquinc catanquin cuate

daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uguë diadbudcuenec diadnuc Esusquio nënantanquio dectampondash.

¹⁹⁻²⁰ Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidèn dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —queshun Pidaton adopac caondash. Aden dada uashun dectanaid isashien Esus chieshëncuido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onquetenonquetenquien dada uaid matses dadpenshun isnushe —quiash ²¹ Pidato chiec nidpac caondash. —Icsamboen chuiquin ma mimbi dada uapacoc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebi,’ quequid Esus nec,” quequin cuate cuëshë utsin dada uata —caquien ²² —Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

²³ Adnubien Esus dectanquido sondado daëddaëdquiec icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi

icquid niondash. ²⁴ Adquid icsho isun: — Canchenquio icquin ¿tsundanquio bedequé? Isnuna —queshun abi cuëmédquidtedi dada uabanshun tēchun sandoshon cadotanequin dada uaidēmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “‘Abentse-abentsen con dashcute bedosh. Con dashcute utsi bednu, quequin dada uaidēmpi abia puduemiaid isnuen naosh,’ quependac,” quequin dada uapampic.

²⁵ Adnubien Esus dectanaid cuate tayun nēidtedi icpondash. Nēidic Esusēn tita. Nēidic Esusēn tita utsi. Nēidic Madia Codopasēn chido. Nēidic Madia utsi Mactada yacnuēsh choquid. Aidtedi chido icpondash. ²⁶ Nē chido tabadnuc ambobi uquēctšéc tabadondabi. Adec ambi tantiaidquio ēbi icsho isun Esusēn aniba chuipondash. —Nēid con mado cata, tita. Ma mibi bēdamboen dayun uanu —capondash Esusēn. ²⁷ Adshumbic ēbitsen chuiquin: —Con ta tita cata. Adshun bēdamboen ēbi dayun uashunta —cac con shubunobi buanondambi bēdamboen Esus dayun uashunuen.

²⁸ Adboshien unēsquionoshi Esus: —Con Pan chiacpadomboen nainembi. Matses tantiec ēbided ciudadec unēsebi —quequin tantiec con tsusedpan dada uaquin chuiampicpadec: —Acte bundobi —quepondash Esus. ²⁹ Adsho tantiaishun matsun acte mucambo icquid anidquid shapu-shapupactšécquidēn punshun cuate dēdectanshun abuc sananquin ēccuēscadonetsēcquin chishmepondash. ³⁰ Adoac acte mucambo icquid

chishtanequien: –Con Pan chiacpadomboen nainquiombi –quepondash. Adtanequi tédquëdbudpondash Esus unësequi.

Esus uinte masiaid

³¹ Adnubien Esus chieshënquido: –Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuستن dectanquin unës uaid chococac icsambo ictsiashë. Nëbimbobi chococamenu –qeshun Pidato chuitampac caondash. –Baded nidte podquënquin unës uame. Inchësheque –cac ³² Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen. ³³ Adotanquin isquien Esus ënden unësac. Adshobien nidte podquënenquio icpondash.

³⁴ Adotanquimbic: –Unësabi icnushe –qeshun: –Unës uaquiobono –quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. ³⁵ –Adosho ëmbimbo isondambi –caimbi. –Ëmbi dada uaid isun ma Esus tantianu –qeshun abimbo chuiquin dada uaombi nëid dada uaqin. ³⁶ Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. ³⁷ Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid
(*Mat 27.57-61; Mad 15.42-47; Duc 23.50-56*)

³⁸ Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. ³⁹ Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc ³⁵ quidostembi icnuc bëac caondash. ⁴⁰ Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquin. Adshumbic padpiden dabiunoaquin. Adshumbic dataneoquin. Chococanun con matsesën adoquid. ⁴¹⁻⁴² Adashic: —Badiadash Nuquin Papan matamiampid inchësh tantiate ushën unësaid chococac icsambo ictsi-ashe. Badedquio chococanu —qeshun tied nèbi ictsëcquidën Esus buampac caondash. Buanshumbic cuënote dapa shëcuë uaid chucan mat-ses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

20

Esus uincuenaid

(Mat 28.1-10; Mad 16.1-8; Duc 24.1-12)

¹ Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote

dapa bëcunepamboen shëcniac. ² Cuënote dapa bëcunepamboen shëcniacsho istanec titinquieranec choquin chuituidpondashi. —Esus padoen buanchitaccosh. ¿Mitsimbo buampash? — quepondash Madia Petedobëdta ëbi chuituidec.

³ Adoaquini: —Istanu —quianec ⁴ titinquieranec chococacno Petedobëdi nidpondac. Petedo nianec ëbia nidpondabi. ⁵ Adshumbimbi puduedenquo icquin shëcuë anshuebudshun anispondac. Adshun isquien dashcute dataniaiduidtsëqui uec. ⁶ Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. ⁷ Në dataniaid uenubi udictsëc dashcutempi bëpucaid bëdamboen shëbunaid uiondash. ⁸ Aid puduedsho istanec tsyuec puduedshun ëmbitsen isondambi. Adash: — Uincuenac. Nuquin Papan Madombobi nec — quepondabi Petedobëdtsëqui onquec. ⁹ —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquo icboedi adondabi. ¹⁰ Aden istanec ëbi ushbocnobidi chiec choapondabi.

*Esusën Madia Mactada yacnocquid ismiaid
(Mad 16.9-11)*

¹¹ Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien ¹² Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë

icbocno tsadpac caondash. ¹³ Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec ¹⁴ aucbidi nidnuec bidiadshun isquien Èsusquio icpec. Utsi dansho ¹⁵ Esusëntsën: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquioibi chuiquimbi.

¹⁶ Abi adoshobien Esusën: —Èbi nebi, Madia —cac bëisquiotanequien: —Esus nec. Èbi chuiquidquio nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho. ¹⁷ Aden abi dayumbudshobien Esusën: —Èbi dayunenda. Padpidec nidenquio icte danquin ëbi dayunenda. Èmbi chuibopadec con Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuiboedquio chuitan. “ ‘Nuquin Papa yacno nidendabi,’ quiosh,” catan —quepac caondash Esus. ¹⁸ Adoaquien ëbi chiec Madia chopondash. —Nuquin Icbo Esus isombi. Uincuenaccosh. Ambi chuiboed chuinu. Tantia —quequin Esusën abi chiaidquio chuituidpondashi Madian Mactada yacnocquidën.

*Uincuenshun Esusën abëd icquido ismiaid
(Mat 28.16-20; Mad 16.14-18; Duc 24.36-49)*

¹⁹ Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënquido dacuëdënquin umanucuësh utsi

puduedtiapimbo icnuc bēdamboen bētashash
 tabadnubien shēcuēnuēsh puduedenquo
 icboedi nuntanquiobi Esus isadcuempondash.
 Adtanequien: –Dacuēdenda –quepondash.
²⁰ Adtanquin abi bēchun shuin mētoccaid
 abi podo ansiaidbēdta ismiaquini cuishon-
 quiampondac: –Nuquin Icbo uincuenac –
 quiash. ²¹ Adec cuishonquesho isashien ambi
 chuibocpadecebidi: –Dacuēdenda –quetanec:
 –Tantia. Mibi chuinu. Con Pan: “Matšes
 chiec nid,” ēbi caondacpadomboembidi: “Ēbi
 chuibeneta,” mibi caimbi –quepondash Esus.
²² Adtanquin ēbi chedo dabushcabanpondash.
 Dabushcabanashic: –Nuquin Papan Mayan
 mibēd tabadendac. ²³ Mibēd icquin Nuquin
 Papan tantiaidquo tantiamequin Nuquin Papan
 Mayanēn mibi utsibo chuibamendac. Adoac
 mimbi aden chuibanaido caic: “Nuquin Papan
 chiaid niaquec icsambo icboedi Esus tantiaquid
 yansho Nuquin Papan nēid bēdamboen isec,”
 quequin mimbi chiacpadomboen Nuquin Papan
 bēdamboen istsiash. Utsien: “Nuquin Papan chiaid
 niaquec icsauidequi icsho nēid Nuquin Papan
 bēdamboen istiapimbo iquec,” quequin mimbi
 chiacpadomboembidi Nuquin Papan bēdamboen
 istiapimbo ictsiash –quepondash Esus ēbi chedo
 chiec. Adtanequi isadenquo yanoaondash.

Esusēn Tomas ismiaid

²⁴ Adec Esus isadenquo yanoanubien Esusbēd
 icboed utsi Tomas abi ushēmbi anin daēd
 tishaid chopondash. ²⁵ Choshobi: –Esus
 isombi –cac: –¿Aidquiobida nepash? Utsien
 nechitash. Bēchun shuin mētoccaid shēcuē isun

aid shëcuë mēdanten bēmishquinc podò ansiaid bēmishquinc caquioshombimbi: “Ai, nuquin Icho uincuenac,” quequin tantiatsiac. Padambobi: “Con Icbobien niash,” quetiapimbo iquebi — quepondash Tomas. ²⁶ Tomas adbon 7tedec ushash shubu nuntambidi tabadoapondabi. Tomas chedobēdi tabadondabi. Puduedtiapimbo icnuc padpiden bētashoash tabadnubien shëcuë shëcniabi Esus isadcuenoapondash. Adashic: — Dacuēdenda — queoapondash. ²⁷ Adtanequien: — Is con mēdante, Tomas. Shëcuë bēmishec cho. Nē podò ansiaid iqueque. Aidtsen bēmishec cho. Adshun: “Uincuenabien icchitash,” queboedēmbi: “Uincuenaccosh,” quequin tantiata — caquien ²⁸ mishenquoio yec badedi: — Tso. Con Icbombo ma mibi neyoc. Nuquin Papapadquidquiobidi ma mibi neyoc — quepondash Tomas. ²⁹ Adsho tantiashien Esus: — Ēbi isun: “Nuquin Papapadquidquiobidi mibi nec,” quequin mīmbi ēbi tantiec. Utsibombien ēbi isabi: “Ai, Esus Nuquin Papapadquidquiobidien nec,” quequin ēbi tantiasho Nuquin Papan bēdambo icmendac — quepondash Esus Tomas chiec. Adtanec isadenquoio yanoapondash.

³⁰ Comapenen tantiaquidquoio yec abembi uincuenash Esus adpondash. Ēnden unēsabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹ Padi, aidtedi chiombi. — “Nuquin Papan chomiaidquoio yec Nuquin Papan Madombobien Esus nec,” quequin aid tantiash

ma Nuquin Papa yacno abëd tabadtequido icpanu
—quequin aitedi dada uaombi.

21

Chian cuëmanuësh Esus isadoaid

¹ Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. ² Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aitedi icpondabi. ³ Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

⁴ Badiadquionobi acte cuëman masi dapan Esus nidsho istuidpondambi. Utsiembi dampondac. ⁵ Adshobini Èsusën cuëmpondash. —Con utsibo gtedtsi bedo? —cac: —Padambo. Nibëdosh —capondambi. ⁶ Adsho tantiashun: —Mimbi nëniauc nënenquio icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

⁷ Adsho isumbimbi: –Ma Esus neyoc, Petedo. Nuquin Icho nec –capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nêpudunash Petedo tan-tanidec nidpondash Esus isnuec.

⁸ Èbien utsibobëd canombi tsyuec nidondac nêshaid shoyombanec. Cuëma anoentsëqui nuëcquid bedash 100 metedos cactiontsëc nidondabi.

⁹ Tsyuec choash pudundoshon isquien pambëdi nuëcquid cuëten shëadtsec.

¹⁰ Adnubien Esusën: –Mimbi bedboed daëdpactsëc beccho. Penu –cac ¹¹ Petedo: –Ai, bedtanu –quianec nidash cano anidtoson nêshaid cubucubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nêshaid têsëdtiadtsëcquio icnuc indondambi.

¹²⁻¹³ Adshumbic ambi: –Pec cho –cac cho-choash tabadsho pamba menebantanquin nuëcquidtsen Esusën menebampondashi. Adoac: –¿Tsutsi ne? –quenquio icquin: –Esus nec. Comapenen tantiaquin nuëcquid nuqui bedmiosh –quequin tantiondambi èbitedishun.

¹⁴ Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusën Petedo chiaid

¹⁵ Aden chian dapa cuëmanshun Esusbëdtan piondambi. Adshumbic Onas caidën mado Petedo Esusën chuipondash. –Tantia. Mibi chuinu, Petedo. Nêidon èbi bëdiactsëc tantianuc ¿ada èbi tantiaquie? –caquien: –Ai, mibi tantiambi. Aden èmbi

tantiaid mimbi tantiec –quepondash Petedo. Adsho tantiash: –Ëbi tantiaquin con obecabimboecquido ëbi dayun uashunta –quepondash Esus. –Obeca icbon aton yua dayun uacimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta –quequin tantiec adpondash. ¹⁶ Adshumbic padpiden: –¿Ada ëbi tantiaquie, Petedo? –cac: –Ai, mambi mibi tantieyoc –quesho tantiashien padpidec: –Ëbi tantiaquin con obecabimboecquido ëbi dayun uashunta –queoapondash Esus. ¹⁷ Aden daëden chuishumbic padpiden Esusën: –¿Ada ëbi tantiaquie, Petedo? –cac shubiantiadtsëcquio yanondash Petedo. –Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi –quiash shubiantiadtsëcquio yanondash. Adashic: –Mibi con Icho nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc –quepondash Petedo. Adsho tantiash Esus padpidec: –Ëbi tantiaquin con obecabimboecquido ëbi dayun uashunta –queoapondash Esus.

¹⁸ Adashic Petedobidi chuioaic: –Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon ëquë mëdimbudcuentsëcshun mibi nidte bunacmanombo mibi buanendac –quepondash Esus. ¹⁹ –Aden mimbitsen Nuquin Papan chiacpadomboenuidi nabansho ëbi chieshënkuidon mibi unës uaindac –quequin tantiec adpondash Esus. Adashic: –Ënenquio icquin ëbi tantiata –quetanquimbic: –Cho. Nidnu

—cac ëbitedi puduanec nidondabi.

²⁰ Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachochsëqui uesho aidën: “¿Tsutsi cao, Icbo?” capondash. ²¹ ¿Mitsipadec aid unëspatsiash? —queshun: —Ma nëid. ¿Mitsipadec unëspec? —capondash Petedon ëbi unëste Esus chuimequin.

²² Adoaquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadec unësenquio ictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquio iquembique. Ënenquio icquin ëbi tantiata —quepondash Esus.

²³ Adec: —Unësenquio ictsiash —Esus qesho tantiaish ëbi caic: —Esusën tantiaidquio yec Uan unësenquio iquendac —quecuededpondash Esus tantiaquido. ¿Adenda Esusën chuidiondash? Ma padenquio iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadequien unësenquio ictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

²⁴ Aden Esusën nabanondaid ënquin chiombi. Ëmbi isondaidquio chuiquin abimbo chuiquin aidtedi dada uaombi. ²⁵ Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaquin dada uate dadpenquioshë naimbudnetsiambi. Padi. Aidtedi dada

uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

CXXX

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

446da786-5bd1-5ffa-85e2-9eff4052cf8b